

清

史

稿

清史稿

列傳一

后妃

太祖初起草創濶略宮闈未有位號但循國俗稱福晉福晉蓋可敦之轉音史述后妃後人緣飾名之非當時本稱也崇德改元五宮並建位號既明等威漸辨世祖定鼎循前代舊典順治十五年採禮官之議乾清宮設夫人一淑儀一婉侍六柔婉芳婉皆三十慈甯宮設貞容一慎容二勤侍無定數又置女官循明六局一司之制議定而未行康熙以後典制大備皇后居中宮皇貴妃一貴妃二妃四嬪六貴人常在答應無定數分居東西十二宮東六宮曰景仁曰承乾曰鍾粹曰延禧曰永和曰景陽西六宮曰永壽曰翊坤曰儲秀曰啟祥曰長春曰咸福諸宮皆有宮女子供使令每三歲選八旗秀女戶部主之每歲選內務府屬旗秀女內務府主之秀女入宮妃嬪貴人惟上命選宮女子貴人以上得選世家女貴人以下但選拜唐阿以下女宮女子侍上自常在答應漸進至妃嬪后妃諸姑姊妹不赴選帝祖母曰太皇太后母曰皇太后居慈甯壽康甯

壽諸宮先朝妃嬪稱太妃太嬪隨皇太后同居與嗣皇帝年皆逾五十乃始得相見諸宮殿設太監秩最高不逾四品員額有定數廩給有定量分領執事有定程此其大較也二百數十年靈化肅雍設謁蓋寡內鮮燕溺匹嫡之嫌外絕權戚蠹國之釁彬彬盛矣追尊四代惟宣皇后著氏族且有繼室託始於是歷朝居正號者謹而次之並及妃嬪有子若受後朝尊封者世祖以漢女爲妃高宗以回女爲妃附書之以其僅見也

顯祖宣皇后

繼妃 唐妃

太祖孝慈高皇后

元妃

繼妃

大妃

壽康太妃

太祖繼妃

太宗孝端文皇后

孝莊文皇后

敏惠恭和元妃

懿靖大貴妃

康惠淑妃

太宗繼妃

世祖廢后

孝惠章皇后

孝康章皇后

孝獻皇后 貞妃

淑惠妃 宣祖嫡妃

聖祖孝誠仁皇后

孝昭仁皇后

孝懿仁皇后

孝恭仁皇后

敬敏皇貴妃 定妃 通順

惇怡皇貴妃 宣祖庶孫貴妃

世宗孝敬憲皇后

孝聖憲皇后

敦肅皇貴妃

純懿皇貴妃 宣宗嫡妃

高宗孝賢純皇后

皇后烏拉納喇氏

孝儀純皇后

慈賢皇貴妃

純惠皇貴妃

慶恭皇貴妃

哲憫皇貴妃

淑嘉皇貴妃

婉貴太妃 高宗嫡妃

仁宗孝淑睿皇后

孝和睿皇后

恭順皇貴妃

和裕皇貴妃

仁宗繼妃

宣宗孝穆成皇后

孝慎成皇后

孝全成皇后

孝靜成皇后

莊順皇貴妃

彤貴妃

宣宗繼妃

文宗孝德顯皇后

孝貞顯皇后

孝欽顯皇后

莊靜皇貴妃

宣宗繼妃

端恪皇貴妃

文宗繼妃

穆宗孝哲毅皇后

淑慎皇貴妃

莊和皇貴妃

穆宗繼妃

德宗孝定景皇后

端康皇貴妃

恪順皇貴妃

宣統皇后

載統

顯祖宣皇后喜塔臘氏都督阿古女歸顯祖爲嫡妃歲己未太祖生歲己巳崩
順治五年與肇祖原皇后興祖直皇后景祖翼皇后同時追諡子三太祖舒爾
哈齊雅爾哈齊女一下嫁噶哈善哈斯虎

繼妃納喇氏哈達部長萬所撫族女遇太祖寡恩年十九俾分居子產獨薄子
一巴雅喇庶妃李佳氏子一穆爾哈齊

太祖孝慈高皇后納喇氏葉赫部長楊吉努女太祖初起兵如葉赫楊吉努以
后許焉楊吉努爲明總兵李成梁所殺子納林布祿繼爲貝勒又爲成梁擊破
歲戊子秋九月以後來歸上率諸貝勒大臣迎之大宴成禮是歲后年十四歲
壬辰冬十月太宗生歲癸卯秋后病作思見母上遣使迎焉納林布祿不許是
月庚辰后崩年二十九后莊敬聰慧詞氣婉順得譽不喜聞惡言愉悅不改其
常不好諂諛不信讒佞耳無妄聽口無妄言不預外事殫誠畢慮以事上及崩
上深悼之喪歛祭享有加禮不飲酒茹葷者踰月越三載葬赫圖阿拉尼雅滿
山岡天命九年遷葬東京楊魯山天聰三年再遷葬瀋陽石叡頭山是爲福陵

崇德元年上諡孝慈昭憲純德貞順承天育聖武皇后順治元年祔太廟康熙
元年改諡雍正乾隆累加諡曰孝慈昭憲敬順仁徽懿德慶顯承天輔聖高皇
后子一太宗

元妃佟佳氏歸太祖最早子二褚英代善女一下嫁何和禮

繼妃富察氏歸太祖亦在孝慈皇后前歲癸巳葉赫諸部來侵上夜駐軍寢甚
酣妃呼上覺曰爾方寸亂耶懼耶九國兵來攻豈酣寢時耶上曰我果懼安能
酣寢我聞葉赫來侵以其無期時以爲念既至我心安矣我若負葉赫天必厭
之安得不懼今我順天命安疆土彼糾九國以虐無咎之人天不佑也安寢如
故及旦遂破敵天命五年妃得罪死子二莽古爾泰德格類女一名莽古濟下
嫁鎖木諾杜梭

大妃納喇氏烏喇貝勒滿泰女歲辛丑歸太祖年十二孝慈皇后崩立爲大妃
天命十一年七月太祖有疾浴於湯泉八月疾大漸乘舟自太子河還召大妃
出迎入渾河庚戌舟次雙雞堡上崩辛亥大妃殉焉年三十七同殉者二庶妃

妃子三阿濟格多爾袞多鐸順治初多爾袞攝政七 years 上諡孝烈恭敏獻哲仁
和贊天儼聖武皇后祔太廟八年多爾袞得罪罷謫出廟

壽康太妃博爾濟吉特氏科爾沁郡王孔果爾女太祖諸妃中最老壽順治十
八年聖祖即位尊爲皇曾祖壽康太妃康熙四年薨太祖諸妃稱側妃者四伊
爾根覺羅氏子一阿巴泰女一下嫁達爾漢納喇氏孝慈皇后女弟女一下嫁
固爾布什其二皆無出稱庶妃者五兆佳氏子一阿拜鈕祜祿氏子二湯古代
塔拜嘉穆瑚覺羅氏子二巴布泰巴布海女三下嫁布占泰達斡蘇納西林覺
羅氏子一賴慕布伊爾根覺羅氏女一下嫁鄂扎伊

太宗孝端文皇后博爾濟吉特氏科爾沁貝勒莽古思女歲甲寅四月來歸太
祖命太宗親迎至輝發扈爾奇山城大宴成禮天聰間后母科爾沁大妃屢來
朝上迎勞錫賚有加禮崇德元年上建尊號后亦正位中宮二年大妃復來朝
上迎宴越二日大妃設宴上率后及貴妃莊妃幸其行幄尋命追封后父莽古
思和碩福親王立碑於墓封大妃爲和碩福妃使大學士范文程等冊封世祖

即位尊爲皇太后順治六年四月乙巳崩年五十一七
年上諡雍正乾隆累加諡曰孝端正敬仁懿哲順慈
僖莊敏輔天協聖文皇后女三下嫁額哲奇塔特
巴雅思祜朗

孝莊文皇后博爾濟吉特氏科爾沁貝勒塞桑女孝端皇后姪也天命十年二
月來歸崇德元年封永福宮莊妃三年正月甲午世祖生世祖即位尊爲皇太
后十一年贈太后父塞桑和碩忠親王母賢妃十三年二月太后萬壽上製詩
三十首以獻上承太后訓撰內則衍義並爲序以進聖祖即位尊爲太皇太后
九年上奉太后謁孝陵十年謁福陵昭陵十一年幸赤城湯泉經長安嶺上下
馬扶輦至坦道始上馬以從還度嶺正大雨仍下馬扶輦太后命騎從上不可
下嶺乃乘馬傍輦行吳三桂亂作頻年用兵太后念從征將士勞苦發宮中金
帛加犒聞各省有偏災輒發帑振卹布爾尼叛師北征太后以慈甯宮庶妃有
母年九十餘居察哈爾告上誠師行毋擄掠國初故事后妃王貝勒福晉貝子
公夫人皆令命婦更番入侍至太后始命罷之宮中守祖宗制不蓄漢女上命

儒臣譯大學衍義進太后太后稱善賜賚有加太后不預政朝廷有黜陟上多告而後行嘗勉上曰祖宗騎射開基武備不可弛用人行政務敬以承天虛公裁決又作書以誡曰古稱爲君難蒼生至衆天子以一身臨其上生養撫育莫不引領必深思得衆得國之道使四海咸登康阜綿厯數於無疆惟休汝尙寬裕慈仁溫良恭敬慎乃威儀謹爾出話夙夜恪勤以祇承祖考遺緒俾予亦無疚於厥心十九年四月上撰大德景福頌進太后二十年上復奉太后幸湯泉雲南平上詣太后宮奏捷二十一年上詣奉天謁陵途次屢奏書問安使獻方物奏曰臣到盛京親網得鱖鰭浸以羊脂山中野燒自落榛實及山核桃朝鮮所進柿餅松栗銀杏附使進上伏乞俯賜一笑不勝欣幸二十二年夏奉太后出古北口避暑秋幸五臺山至龍泉關上以長城嶺峻絕試輦不能陟奏太后次日太后輦登嶺路數折不可上太后乃還詔泉關命上代禮諸寺二十四年夏上出塞避暑次博洛和屯聞太后不豫即馳還京師太后疾良已二十六年九月太后疾復作上晝夜在視十二月步禱天壇請減算以益太后讀祝上泣

陪祀諸王大臣皆泣太后疾大漸命上曰太宗奉安久不可爲我輕動況我心戀汝父子當於孝陵近地安厝我心始無憾己巳崩年七十五上哀慟欲於宮中持服二十七月王大臣屢疏請遵遺誥以日易月始從之命撤太后所居宮移建昌瑞山孝陵近地號暫安奉殿二十七年四月奉太后梓宮詣昌瑞山自是歲必詣謁雍正三年十二月世宗即其地起陵曰昭西陵世祖親政上太后徽號國有慶必加上至聖祖以雲南平奏捷定徽號曰昭聖慈壽恭簡安懿章慶敦惠溫莊康和仁宣弘靖太皇太后初奉安上諡雍正乾隆累加諡曰孝莊仁宣誠憲恭懿至德純徽翊天啟聖文皇后子一世祖女三下嫁西爾塔哈爾色布騰鏗吉爾格

敏惠恭和元妃博爾濟吉特氏孝莊皇后姊也天聰八年來歸崇德元年封關雎宮宸妃妃有寵於太宗生子爲大赦子二歲而殤未命名六年九月太宗方伐明聞妃病而還未至妃已薨上慟甚一日忽迷惘自午至酉始寢乃悔曰天生朕爲撫世安民豈爲一婦人哉朕不能自持天地祖宗特示譴也上仍悲悼

不已諸王大臣請出獵遂獵蒲河還過妃墓復大慟妃母和碩賢妃來弔上命內大臣掖輿臨妃墓郡王阿達禮輔國公扎哈納當妃喪作樂皆坐奪爵

懿靖大貴妃博爾濟吉特氏阿霸垓郡王額齊格諾顏女崇德元年封麟趾宮貴妃四年額齊格諾顏及其妻福晉來朝妃率諸王貝勒迎宴次日上賜宴清甯宮福晉入見稱上外姑順治九年世祖加尊封康熙十三年薨聖祖侍太后臨奠子一博穆博果爾女一下嫁噶爾瑪索諾木又撫蒙古女嫁噶爾瑪德參濟旺子也

康惠淑妃博爾濟吉特氏阿霸垓塔布囊博第塞楚祜爾女崇德元年封衍慶宮淑妃撫蒙古女上命睿親王多爾袞娶焉順治九年加尊封前懿靖大貴妃薨太宗諸妃元妃鈕祜祿氏宏毅公額亦都女子一格博會繼妃烏拉納喇氏子二豪格洛格女一下嫁班第稱側妃者二葉赫納喇氏子一碩塞扎魯特博爾濟吉特氏女二下嫁夸扎哈尙稱庶妃者六納喇氏子一高塞女二下嫁輝塞拉哈奇墨氏察哈爾部人女一下嫁吳應熊顏扎氏子一葉布舒伊爾根覺

羅氏子一常舒其二不知氏族一生子韜塞一生女下嫁班第

世祖廢后博爾濟吉特氏科爾沁卓禮克圖親王吳克善女孝莊文皇后姪也
后麗而慧睿親王多爾袞攝政爲世祖聘焉順治八年八月冊爲皇后上好簡
樸后則嗜奢侈又妬積與上忤十年八月上命大學士馮銓等上前代廢后故
事銓等疏諫上嚴拒諭以無能故當廢責諸臣沽名即日奏皇太后降后爲靜
妃改居側宮下禮部禮部尙書胡世安侍郎呂崇烈高珩疏請慎重詳審禮部
員外郎孔允樾及御史宗敦一潘朝選陳棐紀椿杜果聶玠張嘉李敬劉秉政
陳自德祖永杰高爾位白尙登祖建明各具疏力爭允樾言尤切略言皇后正
位三年未聞失德特以無能二字定廢嫡之案何以服皇后之心何以服天下
後世之心君后猶父母父欲出母卽心知母過猶涕泣以諫況不知母過何事
安忍緘口而不爲母請命上命諸王貝勒大臣集議議仍以皇后位中宮而別
立東西兩宮上不許令再議並責允樾覆奏允樾疏引罪諸王大臣再議請從
上指於是后竟廢

孝惠章皇后博爾濟吉特氏科爾沁貝勒綽爾濟女順治十一年五月聘爲妃
六月册爲后貴妃董鄂氏方幸后又不當上旨十五年正月皇太后不豫上責
后禮節疏闕命停應進中宮箋表下諸王貝勒大臣議行三月以皇太后旨如
舊制封進聖祖即位尊爲皇太后居慈仁宮上奉太皇太后謁孝陵幸盛京謁
福陵昭陵出古北口避暑幸五臺山皆奉太后侍行二十二年上奉太皇太后
出塞太后未侍行中途射得鹿斷尾漬以鹽並親選榛實進太后二十六年太
皇太后不豫太后朝夕奉侍及太皇太后崩太后悲痛諸妃主入臨太后慟甚
幾仆地上命諸王大臣奏請太后節哀回宮再請乃允歲除諸王大臣請太后
諭上回宮上不可二十七年正月行虞祭上命諸王大臣請太后勿往行禮太
后亦不可二十八年建寧壽新宮奉太后居焉三十五年十月上北巡太后萬
壽上奉書稱祝駐蹕蘇太后遣送衣裘上奉書言時方煥河未冰帳房不須置
火俟嚴寒即歡抃而服之三十六年二月上親征噶爾丹駐他喇布拉克太后
以上生日使賜金銀茶壺上奉書拜受噶爾丹既定羣臣請上加太后徽號壽

康熙卅太后以上不受尊號亦堅諭不受三十七年七月奉太后幸盛京謁陵道喀爾沁途中以太后父母塋發庫山距蹕路二百里諭內大臣索額圖擇潔地太后遙設祭十月次奇爾賽畢喇值太后萬壽上詣行宮行禮敕封太后所駐山曰壽山三十八年上奉太后南巡三十九年十月太后六十萬壽上製萬壽無疆賦並奉佛象珊瑚白鳴鐘洋鏡東珠珊瑚金珀禦風石念珠皮裘羽緞哆羅呢沈檀芸降諸香犀玉瑪瑙藍漆諸器宋元明名畫金銀幣帛又令膳房數米萬粒號萬國玉粒飯及肴饌果品以獻四十九年太后七十萬壽亦如之五十六年十一月太后不豫是歲上春秋六十有四方有疾頭眩足腫聞太后疾甚以帕纏足乘輦輿詣視跪牀下捧太后手曰母后臣在此太后張目畏明障以手視上執上手已不能語上力疾於蒼震門內支幄以居丙戌太后崩年七十七上號慟盡禮五十七年三月葬孝陵之東曰孝東陵初上太后徽號國有慶必加上至雲南平定曰仁憲恪順誠惠純淑端禧皇太后及崩上謚大學士等初議誤不繫世祖諡上令至太廟奉先殿瞻禮高皇后文皇后神位大學

士等引罪又以所擬諡未多留徽號字命更議雍正乾隆累加諡曰孝惠仁宣端懿慈淑恭安純德順天翊聖章皇后

孝康章皇后佟佳氏少保固山額真佟圖賴女后初入宮爲世祖妃十一年春妃詣太后宮問安將出衣裾有光若龍繞太后問之知有妊謂近侍曰朕妊皇帝實有斯祥今妃亦有是生子必膺大福三月戊申聖祖生聖祖卽位尊爲皇太后二年二月庚戌崩年二十四初上徽號曰慈和皇太后及崩葬孝陵上諡雍正乾隆累加諡曰孝康慈和莊懿恭惠溫穆端靖崇文育聖章皇后后家佟氏本漢軍上命改佟佳氏入滿洲后族撤旗自此始子一聖祖

孝獻皇后棟鄂氏內大臣鄂碩女年十八入侍上眷之特厚寵冠後宮十三年八月立爲賢妃十二月進皇貴妃行冊立禮頒赦上皇太后徽號鄂碩本以軍功授一等精奇尼哈番進二等伯十七年八月薨上輟朝五日追諡孝獻莊和至德宣仁溫惠端敬皇后上親製行狀略曰后婉靜循禮事皇太后奉養甚至左右趨走皇太后安之事朕晨夕候興居視飲食服御曲體罔不悉朕返蹕晏

必迎問寒暑意少親則曰陛下歸晚體得毋倦耶趣具餐躬進之命共餐則辭
朕值慶典舉數觴必誠侍者室無過燠中夜愀愀起視朕省封事夜分未嘗不
侍側諸曹循例章報朕輒置之后曰此雖奉行成法安知無當更張或有他故
奈何忽之令同閱起謝不敢干政覽廷獻疏握筆未忍下后問是疏安所云朕
諭之則泣曰諸辟皆愚無知豈盡無冤宜求可矜宥者全活之大臣偶得罪朕
或不樂后輒請霽威詳察朕偶免朝則諫母倦勤日講後與言章句大義輒喜
偶遺忘則諫當服膺默識蒐狩親騎射則諫母以萬邦仰庇之身輕於馳驟偶
有未稱旨朕或加譴讓始猶自明無過及聞姜后脫簪事即有宜辨者但引咎
自責而已后至節儉不用金玉誦四書及易已卒業習書未久即精朕喻以禪
學參究若有所省后初病皇太后使問安否必對曰安疾甚朕及今后諸妃嬪
環視之后曰吾殆將不起此中澄定亦無所苦獨不及酬皇太后暨陛下恩萬
一妾歿陛下宜自愛惟皇太后必傷悼奈何既又令以諸王賻施貧乏復屬左
右母以珍麗物歛歿後皇太后哀之甚行狀數千言又命大學士金之俊別作

傳是歲命秋讞停決從后志也時鄂碩已前卒后世父羅碩授一等阿思哈尼哈番及上崩遺詔以后喪祭踰禮爲罪已之一康熙二年合葬孝陵主不附廟歲時配食饗殿子一生三月而殤未命名貞妃棟鄂氏一等阿達哈哈番巴慶女殉世祖聖祖追封爲皇考貞妃

淑惠妃博爾濟吉特氏孝惠皇后妹也順治十一年冊爲妃康熙十二年尊封皇考淑惠妃妃最老壽以五十二年十月薨同時尊封者浩齊特博爾濟吉特氏爲恭靖妃阿霸垓博爾濟吉特氏爲端順妃皆無所出棟鄂氏爲寧愍妃在世祖時號庶妃子一福全又恪妃石氏灤州人吏部侍郎申女世祖嘗選漢官女備六宮妃與焉居永壽宮康熙六年薨聖祖追封皇考恪妃又在三妃前世祖庶妃有子女者又有八人穆克圖氏子承幹八歲殤巴氏子鈕鈕爲世祖長子二歲殤女二一六歲殤一七歲殤陳氏子一常寧唐氏子一奇授七歲殤鈕氏子一隆禧楊氏女一下嫁納爾杜烏蘇氏女一八歲殤納喇氏女一五歲殤聖祖孝誠仁皇后赫舍里氏輔政大臣一等大臣索尼孫領侍衛內大臣噶布

喇女康熙四年七月冊爲皇后十三年五月丙寅生皇三子允禔卽於是日崩年二十二諡曰仁孝皇后二十年葬孝東陵之東卽景陵也雍正元年改諡乾隆嘉慶累加諡曰孝誠恭肅正惠安和淑懿恪敏儼天襄聖仁皇后子二承祜四歲殤允禔

孝昭仁皇后鈕祜祿氏一等公遏必隆女初爲妃康熙十六年八月冊爲皇后十七年二月丁卯崩二十年與仁孝皇后同葬上每謁孝陵輒臨仁孝昭兩后陵奠醑乾隆嘉慶累加諡曰孝昭靜淑明惠正和安裕端穆欽天順聖仁皇后

孝懿仁皇后佟佳氏一等公佟國維女孝康章皇后姪女也康熙十六年爲貴妃二十年進皇貴妃二十八年七月病篤冊爲皇后翼日甲辰崩諡曰孝懿皇后是冬葬仁孝昭兩后之次雍正乾隆嘉慶累加諡曰孝懿溫誠端仁憲穆和恪慈惠奉天佐聖仁皇后女一殤

孝恭仁皇后烏雅氏護軍參領威武女后事聖祖康熙十七年十月丁酉世宗

生十八年爲德嬪二十年進德妃世宗即位尊爲皇太后擬上徽號曰仁壽皇太后未上冊雍正元年五月辛丑崩年六十四葬景陵上諡曰孝恭宣惠溫肅定裕慈純欽穆贊天承聖仁皇后子三世宗允祚允禩允祿六歲殤女三其二殤一下嫁舜安顏

敬敏皇貴妃章佳氏事聖祖爲妃康熙三十八年薨諡曰敏妃雍正初世宗以其子怡親王允祥賢追進封妃又生女二下嫁倉津多爾濟定妃萬琉哈氏事聖祖爲嬪世宗尊爲皇考定妃就養其子履親王允禩邸高宗朝歲時伏臘輒迎入宮中上壽然未進尊封薨年九十七通嬪納喇氏事聖祖爲貴人雍正二年世宗以其婿喀爾喀郡王策棱功尊封乾隆九年薨子二萬福五歲殤允禩二歲殤女一

惇怡皇貴妃瓜爾佳氏事聖祖爲和妃世宗尊爲皇考貴妃高宗尊爲皇祖溫惠皇貴太妃乾隆三十三年薨年八十六諡曰惇怡皇貴妃葬景陵側皇貴妃圓寢女一殤聖祖諸妃妃薨最後乾隆初同時尊封者愍惠皇貴妃佟佳氏孝

懿皇后妹事聖祖爲貴妃世宗尊爲皇考皇貴妃高宗尊爲皇祖母壽祺皇貴太妃薨諡曰愍惠皇貴妃順懿密太妃王氏初爲密嬪自密妃尊封子三允禩允祿允祈允禔八歲殤純裕勅太妃陳氏初爲勳嬪自勳妃尊封子一允禮襲嬪高氏自貴人尊封子一允禔女一殤謹嬪色赫圖氏自貴人尊封子一允祜靜嬪石氏自貴人尊封子一允祁熙嬪陳氏自貴人尊封子一允禧穆嬪陳氏自貴人卒後追尊封子一允祕其卒於康熙中及雖下逮雍正乾隆而未尊封者又有溫僖貴妃鈕祜祿氏孝昭皇后妹子一允禔女一殤惠妃納喇氏子二承慶殤允禔宜妃郭絡羅氏當聖祖崩時妃方病以四人舁軟榻詣喪所出太后前世宗見之又傲世宗爲詰責宮監子三允祺允禔允祜十二歲殤榮妃馬佳氏子五承瑞爲聖祖長子四歲殤賽音察渾長善長生皆殤允祉女一下嫁烏爾滾成妃戴佳氏子一允祐良妃衛氏子一允禔平妃赫舍里氏孝誠皇后妹子一允禔殤端嬪董氏女一殤貴人兆佳氏女一下嫁噶爾臧郭絡羅氏宜妃妹子一允禔殤女一下嫁敦多布多爾濟袁氏女一下嫁孫承運陳氏子

一允禩殤庶妃鈕祜祿氏女一張氏女二王氏女一劉氏女一皆殤

世宗孝敬憲皇后烏喇那拉氏內大臣費揚古女世宗爲皇子聖祖冊后爲嫡福晉雍正元年冊爲皇后九年九月己丑崩時上病初愈欲親臨含斂諸大臣諫止上諭曰皇后自垂簪之年奉皇考命作配朕躬結縭以來四十餘載孝順恭敬始終一致朕調理經年今始全愈若親臨喪次觸景增悲非攝養所宜但皇后喪事國家典儀雖備而朕禮數未周權衡輕重如何使情文兼盡其具議以聞諸大臣議以明會典皇后喪無親臨祭奠之禮令皇子朝夕奠遇祭例可遣官乞停親奠從之諡孝敬皇后及世宗崩合葬泰陵乾隆嘉慶累加諡曰孝敬恭和懿順昭惠莊肅安康佐天翊聖憲皇后

孝聖憲皇后鈕祜祿氏四品典儀凌柱女后年十三事世宗潛邸號格格五十年八月庚午高宗生雍正中封熹妃進熹貴妃高宗即位以世宗遺命尊爲皇太后居慈寧宮高宗事太后孝以天下養惟亦兢兢守家法重國體太后偶言順天府東有廢寺當重修上從之卽召宮監諭汝等嘗侍聖祖幾曾見昭聖太

后當日令聖祖修蓋廟宇嗣後當奏止宮監引悟真庵尼入內導太后弟入蒼震門謝恩上屢誡之上每出巡幸輒奉太后以行南巡者三東巡者三幸五臺山者三幸中州者一謁孝陵獨木蘭歲必至焉遇萬壽率王大臣奉觴稱慶十六年六十壽二十六年七十壽三十六年八十壽慶典以次加隆先期日進壽禮九九先以上親製詩文書畫次則如意佛像冠服簪飾金玉犀象瑪瑙水晶玻璃琺瑯彝鼎彝器書畫綺繡幣帛花果諸外國珍品靡不具備太后爲天下母四十餘年國家全盛親見曾元四十二年正月庚寅崩年八十六葬泰陵東北曰泰東陵初尊太后上徽號國有慶屢加上曰崇德慈宣康惠敦和裕壽純禧恭懿安祺寧豫皇太后既葬上諡嘉慶中再加諡曰孝聖慈宣康惠敦和誠徽仁穆敬天光聖憲皇后子一高宗

敦肅皇貴妃年氏巡撫退齡女事世宗潛邸爲側福晉雍正元年封貴妃三年十一月妃病篤進皇貴妃並諭妃病如不起禮儀視皇貴妃例行妃薨逾月妃兄薨堯得罪死諡曰敦肅皇貴妃乾隆初從葬泰陵子三福宜福惠福沛皆殤

女一亦殤

純愍皇貴妃耿氏事世宗潛邸爲格格雍正間封裕嬪進裕妃高宗時屢加尊爲裕皇貴太妃四十九年薨年九十六諡曰純愍皇貴妃葬妃園寢位諸妃上子一宏璽世宗諸妃又有齊妃李氏事世宗潛邸爲側室福晉雍正間封齊妃子三宏盼宏昀皆殤宏時女一下嫁星德謙妃劉氏事世宗潛邸號貴人雍正間封謙嬪高宗尊爲皇考謙妃子一宏瞻懋嬪宋氏事世宗號格格雍正初封懋嬪女二皆殤

高宗孝賢純皇后富察氏察哈爾總管李榮保女高宗爲皇子雍正五年世宗册后爲嫡福晉乾隆二年册爲皇后恭儉平居以通草絨花爲飾不御珠翠歲時以鹿羔毳毼製爲荷包進上仿先世關外遺製示不忘本也上甚重之十三年從上東巡還蹕三月乙未后崩於德州舟次年三十七上深慟兼程還京師殯於長春宮服縞素十二日初皇貴妃高佳氏薨上諡以慧賢后在側曰吾他日期以孝賢可乎至是上遂用爲諡並製述悲賦曰易何以首乾坤詩何以

首關睢惟人倫之伊始固天儼之與齊念懿后之作配廿二年而於斯痛一旦之永訣隔陰陽而莫知昔皇考之命偶用掄德於名門俾述予而尸藻定嘉禮於渭濱在青宮而養德卽治壺而淑身縱糟糠之未厯實同甘而共辛乃其正位坤寧克贊乾清奉慈闈之溫清爲九卿之儀型克儉於家爰始繼品而育嗣克勤於邦亦知較兩而課晴嗟予命之不辰兮痛元嫡之連棄致黯然以內傷兮遂邈爾而長逝撫諸子如一出兮豈彼此之分視值乖舛之疊遭兮誰不增夫怨歎况顧予之傷悼兮更悵悵而切意尙強歡以相慰兮每禁情而制淚制淚兮淚滴襟強歡兮歡匪心聿當春而啓轡隨予駕以東臨抱輕疾兮念衆勞促歸程兮變故遭登畫舫兮陳翟輪由潞河兮還內朝兮時未幾致邈逅兮怨無已切自尤兮不可追論生平兮定於此影與形兮難去一居忽忽兮如有失對嬪嬙兮想芳型顧和敬兮憐弱質望湘浦兮何先祖求北海兮乏神術循喪儀兮徒愴然例展禽兮設孝賢思遺徽之莫盡兮詎兩字之能宣包四德而首出兮謂庶幾其可傳歷時序之代謝兮屆十旬而迅如視新昌而增慟

兮陳舊物而憶初亦有時而暫弭兮旋觸緒而歎歎信人生之如夢兮了萬事之皆虛嗚呼悲莫悲兮生別離失內位兮孰予隨入椒房兮闕寂披鳳幄兮空垂春風秋月兮盡於此已夏日冬夜兮知復何時十七年葬孝陵西勝水峪後即於此起裕陵焉嘉慶道光累加諡曰孝賢誠正敦穆仁惠徽恭康順輔天昌聖純皇后子永璉永琮女二一殤一下嫁色布騰巴爾珠爾

皇后烏喇那拉氏佐領那爾布女后事高宗潛邸爲側室福晉乾隆二年封嫔妃十年進貴妃孝賢皇后崩進皇貴妃攝六宮事十六年冊爲皇后三十年從上南巡至杭州忤上旨后剪髮上益不懌令后先還京師三十一年七月甲午崩上方幸木蘭命喪儀視皇貴妃自是遂不復立皇后子二永璉永琮女一殤四十二年上東巡有金從善者上書首及建儲次爲立后上因諭曰那拉氏本朕青宮時皇考所賜側室福晉孝賢皇后崩後循序進皇貴妃越三年立爲后其後自獲過愆朕優容如故國俗忌剪髮而竟悍然不顧朕猶包含不行廢斥後以病薨止令減其儀文並未削其位號朕處此仁至義盡況自是不復繼立

皇后從善乃欲朕下詔罪已朕有何罪當自責乎從善又請立后朕眷秋六十有八豈有復冊中宮之理下行在王大臣議從善罪坐斬

孝儀純皇后魏佳氏內管領清泰女事高宗爲貴人封令嬪累進令貴妃二十五年十月丁丑仁宗生三十年進令皇貴妃四十年正月丁丑薨年四十九諡曰令懿皇貴妃葬勝水峪六十年仁宗立爲皇太子命冊贈孝儀皇后嘉慶道光累加諡曰孝儀恭順康裕慈仁端恪敏哲翼天毓聖純皇后后家魏氏本漢軍擢入滿洲旗改魏佳氏子四永璐殤仁宗永璘其一殤未命名女二下嫁拉旺多爾濟札蘭泰

慧賢皇貴妃高佳氏大學士高斌女事高宗潛邸爲側室福晉乾隆初封貴妃薨諡曰慧賢皇貴妃葬勝水峪

純惠皇貴妃蘇佳氏事高宗潛邸即位封純嬪累進純皇貴妃薨諡曰純惠皇貴妃葬裕陵側子一永瑤女一下嫁福隆安

慶恭皇貴妃陸氏初封慶嬪累進慶貴妃薨仁宗以嘗受妃撫育追尊爲慶恭

皇貴妃

哲憫皇貴妃富察氏事高宗潛邸雍正十三年薨乾隆初追封哲妃進皇貴妃
諡曰哲憫皇貴妃葬勝水峪子一永璜爲高宗長子女一殤

淑嘉皇貴妃金佳氏事高宗潛邸爲貴人乾隆初封嘉妃進嘉貴妃薨諡曰淑
嘉皇貴妃葬勝水峪子四永琮永璣永理其一殤未命名

婉貴太妃陳氏事高宗潛邸乾隆間自貴人累進婉妃嘉慶間尊爲婉貴太妃
壽康宮位居首薨年九十二顯貴太妃巴林氏亦自貴人累進顯貴妃尊爲顯
貴太妃亦居壽康宮薨年七十貴人西林覺羅氏柏氏皆自常在進尊爲貴人
晉太妃富察氏事高宗爲貴人逮道光時猶存宣宗尊爲皇祖晉太妃高宗諸
妃有子女者忻貴妃戴佳氏總督那蘇圖女女二皆殤愉貴妃珂里葉特氏子
一永琪舒妃葉赫那拉氏子一殤未命名悼妃汪氏嘗嘗宮婢死上命降爲嬪
未幾復封女一下嫁豐紳殷德又有容妃和卓氏回部台吉和札麥女初入宮
號貴人累進爲妃薨

仁宗孝淑睿皇后喜塔臘氏副都統內務府總管和爾經額女仁宗爲皇子乾隆三十九年高宗冊后爲嫡福晉四十七年八月甲戌宣宗生仁宗受禪冊爲皇后嘉慶二年二月戊寅崩諡曰孝淑皇后葬太平峪後即於此起昌陵爲道光咸豐累加諡曰孝淑端和仁莊慈懿敦裕昭肅光天佑聖睿皇后子一宣宗女二一殤一下嫁瑪尼巴達喇

孝和睿皇后鈕祜祿氏禮部尙書恭阿拉女后事仁宗潛邸爲側室福晉仁宗即位封貴妃孝淑皇后崩高宗勅以后繼位中宮先封皇貴妃六年冊爲皇后二十五年八月仁宗幸熱河崩后傳旨令宣宗嗣位宣宗尊爲皇太后居壽康宮二十九年十二月甲戌崩年七十四宣宗春秋已高方有疾居喪哀毀三十年正月崩於慎德堂喪次咸豐三年葬后昌陵之西曰昌西陵初尊皇太后上徽號國有慶累加上曰恭慈康豫安成莊惠壽禧崇祺皇太后逮崩上諡咸豐間加諡曰孝和恭慈康豫安成欽順仁正應天熙聖睿皇后子二綿愷綿忻女一殤

恭順皇貴妃鈕祜祿氏嘉慶初選入宮爲如貴人累進如妃宣宗尊爲皇考如
皇妃居壽安宮文宗尊爲皇祖如皇貴太妃薨年七十四諡曰恭順皇貴妃子
一綿愉女二殤

和裕皇貴妃劉佳氏事仁宗潛邸嘉慶初封誠妃進誠貴妃宣宗尊爲皇考誠
福皇貴妃薨諡曰和裕皇貴妃子一未命名殤女一下嫁索特納木多爾濟仁
宗諸妃有子女者華妃侯佳氏事仁宗潛邸嘉慶初封榮嬪改進封女一殤簡
嬪關佳氏遜嬪沈佳氏皆事仁宗潛邸號格格嘉慶初追封女各一皆殤仁宗
嬪御至宣宗朝尊封者又有信妃劉佳氏恩嬪烏雅氏榮嬪梁氏皆自貴人進
安嬪蘇完尼瓜爾佳氏自常在進

宣宗孝穆成皇后鈕祜祿氏戶部尙書一等子布顏達賚女宣宗爲皇子嘉慶
元年仁宗册后爲嫡福晉十三年正月戊午薨宣宗即位追册諡曰孝穆皇后
初葬王佐村移寶華峪以地宮浸水再移龍泉峪後卽於此起墓陵焉咸豐初
上諡光緒間加諡曰孝穆溫厚莊肅端誠恪惠寬欽孚天裕聖成皇后

孝愼成皇后佟佳氏三等承恩公舒明阿女宣宗爲皇子嫡福晉薨仁宗册后繼嫡福晉宣宗即位立爲皇后道光十三年四月己巳崩諡曰孝愼皇后葬龍泉峪咸豐初上諡光緒間加諡曰孝愼敏肅哲順和懿誠惠敦恪熙天詒聖成皇后女一殤

孝全成皇后鈕祜祿氏二等侍衛一等男頤齡女后事宣宗册全嬪累進全貴妃道光十一年六月己丑文宗生十三年進皇貴妃攝六宮事十四年立爲皇后二十年正月壬寅崩年三十三宣宗親定諡曰孝全皇后葬龍泉峪咸豐初上諡光緒間加諡曰孝全慈敬寬仁端愍安惠誠敏符天篤聖成皇后子一文宗女二一殤一下嫁德穆楚克扎布

孝靜成皇后博爾濟吉特氏刑部員外郎花良阿女后事宣宗爲靜貴人累進靜皇貴妃孝全皇后崩文宗方十歲妃撫育有恩文宗即位尊爲皇考康慈皇貴太妃居壽康宮咸豐五年七月太妃病篤尊爲康慈皇太后越九日庚午崩年四十四上諡曰孝靜康慈彌天輔聖皇后不繫宣宗諡不祔廟葬慕陵東曰

慕東陵穆宗即位祔廟加諡光緒宣統累加諡曰孝靜康慈懿昭端惠莊仁和
慎弼天輔聖成皇后子三奕綱奕繼奕訢女一下嫁景壽

莊順皇貴妃烏雅氏事宣宗爲常在進琳貴人累進琳貴妃文宗尊爲皇考琳
貴太妃穆宗尊爲皇祖琳皇貴太妃同治五年薨命王公百官持服一日諡曰
莊順皇貴妃葬慕東陵園寢德宗朝迭命增祭品崇規制上親詣行禮封三代
皆一品子三奕譞奕訢奕詝女一下嫁德徽

彤貴妃舒穆魯氏事宣宗爲彤貴人累進彤貴妃復降貴人文宗尊爲皇考彤
嬪穆宗累尊爲皇祖彤貴妃女二一下嫁扎拉豐阿一殤宣宗諸妃有子女者
和妃納喇氏初以宮女子事宣宗潛邸嘉慶十三年子奕緯生仁宗特命爲側
室福晉道光初封和嬪進和妃祥妃鈕祜祿氏事宣宗爲貴人進嬪復降文宗
尊爲皇考祥妃穆宗追尊爲皇祖祥妃子一奕諒女二一殤一下嫁恩崇他無
子女而受尊封者佳貴妃郭佳氏成貴妃鈕祜祿氏皆事宣宗爲貴人進嬪復
降歷咸豐同治二朝進封常妃赫舍哩氏以貴人進封順嬪失其氏以常在進

封恒嬪蔡佳氏豫妃尙佳氏貴人李氏那氏以答應進封

文宗孝德顯皇后薩克達氏太常寺少卿富泰女文宗爲皇子道光二十七年宣宗册后爲嫡福晉二十九年十二月乙亥薨文宗即位追册諡曰孝德皇后權攢田村同治初移靜安莊旋葬定陵上諡光緒宣統屢加諡曰孝德溫惠誠順慈莊恪慎徽懿恭天贊聖顯皇后

孝貞顯皇后鈕祜祿氏廣西右江道穆陽阿女事文宗潛邸咸豐二年封貞嬪進貞貴妃立爲皇后十年從幸熱河十一年七月文宗崩穆宗即位尊爲皇太后是時孝欽皇后兩宮並尊詔旨稱母后皇太后聖母皇太后以別之十一月乙酉朔上奉兩太后御養心殿垂簾聽政同治八年內監安得海出京山東巡撫丁寶楨以聞太后立命誅之十二年歸政於穆宗十三年穆宗崩德宗即位復聽政光緒七年三月壬申崩年四十五葬定陵東普祥峪曰定東陵初尊爲皇太后上徽號國有慶累加上曰慈安端裕康慶昭和莊敬皇太后及崩上諡宣統加諡曰孝貞慈安和慶和敬誠靖儀天祚聖顯皇后

孝欽顯皇后葉赫那拉氏安徽徽州池廣太道惠徵女咸豐元年后被選入宮號懿貴人四年封懿嬪六年三月庚辰穆宗生進懿妃七年進懿貴妃十年從幸熱河十一年七月文宗崩穆宗即位與孝貞皇后並尊爲皇太后是時怡親王載垣鄭親王端華協辦大學士尙書肅順等以文宗遺命稱贊襄政務王大臣擅政兩太后患之御史董元醇請兩太后權理朝政兩太后召載垣等入議載垣等以本朝未有皇太后垂簾雖之侍郎勝保及大學士賈桢等疏繼至恭親王奕訢留守京師聞喪奔赴兩太后爲言載垣等擅政狀九月奉文宗喪還京師即下詔罪載垣端華肅順皆至死並罷黜諸大臣預贊襄政務者授奕訢議政王以上旨命王大臣條上垂簾典禮十一月乙酉朔上奉兩太后御養心殿垂簾聽政諭曰垂簾非所樂爲惟以時事多艱王大臣等不能無所稟承是以姑允所請俟皇帝典學有成即行歸政自是日召議政王軍機大臣同入對內外章奏兩太后覽訖王大臣擬旨翼日進呈閱定兩太后以文宗賜同道堂小璽鈐識仍以上旨頒示旋用御史徐啟文奏令中外臣工於時事闕失直言

無隱用御史鍾佩賢奏諭崇節儉重名器用御史下寶第奏諭嚴賞罰肅吏治
慎薦舉命內直翰林輯前史帝王政治及母后垂簾事跡可爲法戒者以進同
治初寇亂未弭兵連不解兩太后同心求治登進老成倚任將帥粵捻蕩平滇
隴漸定十二年二月歸政於穆宗十三年十二月穆宗崩太后定策立德宗兩
太后復垂簾聽政諭曰今皇帝紹承大統尙在冲齡時事艱難不得已垂簾聽
政萬幾綜理宵旰不遑矧當民生多蹇各省水旱頻仍中外臣工九卿科道有
言事之責者於用人行政凡諸政事當舉與時事有裨而又實能見施行者詳
細敷奏至敦節儉祛浮華宜始自宮中耳目玩好浮麗紛華一切不得上進封
疆大吏當勤求閭閻疾苦加意撫卹清訟獄勤緝捕辦賑積穀飭有司實力奉
行並當整飭營伍修明武備選任賢能牧令與民休息用御史陳彝奏黜南書
房行走侍講王慶祺用御史孫鳳翔等奏黜總管內務府大臣貴寶文錫又罪
宮監之不法者戍三人杖四人一時官府整肅光緒五年葬穆宗惠陵吏部主
事吳可讀從上陵自殺留疏乞降明旨以將來大統歸穆宗嗣子下大臣王議

奏王大臣等請毋庸議尙書徐桐等侍讀學士寶廷黃體芳司業張之洞御史李端棻皆別疏陳所見諫曰我朝未明定儲位可讀所請與家法不合皇帝受穆宗付託將來慎選元良纔承統緒其繼大統者爲穆宗嗣子守祖宗之成憲示天下以無私皇帝必能善體此意也六年太后不豫上命諸督撫薦醫治疾八年疾愈孝貞皇后既崩太后獨當國十年法蘭西倭越南太后責恭親王奕訢等因循貽誤罷之更用禮親王世鐸等並諭軍機處遇緊要事件與醇親王奕譞商辦庶子盛昱錫珍御史趙爾巽各疏言醇親王不宜參豫機務諭曰自垂簾以來揆度時勢不能不用親藩進參機務諭令奕譞與軍機大臣會商事件本專指軍國重事非概令與聞奕譞再四懇辭諭以俟皇帝親政再降諭旨始暫時奉命此中委曲諸臣不能盡知也是年太后五十萬壽十一年法蘭西約定醇親王奕譞建議設海軍十三年夏命會同大學士直隸總督李鴻章巡閱海口遣太監李蓮英從蓮英侍太后頗用事御史朱一新以各直省水災奏請修省辭及蓮英太后不澤責一新覆奏一新覆奏言鴻章具舟迎王王辭之

運英乘以行遂使將吏迎者誤爲王舟太后詰王王遂對曰無之遂黜一新太后命以次年正月歸政醇親王奕譞及王大臣等奏請太后訓政數年德宗亦力懇再三太后乃許之王大臣等條上訓政典禮命如議行請上徽號堅不許十五年德宗行婚禮二月己卯太后歸政御史屠仁守疏請太后歸政後仍披覽章奏裁決施行太后不可諭曰垂簾聽政本萬不得已之舉深宮遠鑒前代流弊特飭及時歸政歸政後惟醇親王單銜具奏暫須徑達醇親王密陳初裁大政軍國重事定省可以稟承並非著爲典常使訓政永無底止因斥仁守乖謬奪官同治間穆宗議修圓明園奉兩太后居之事未行德宗以萬壽山大報恩延壽寺高宗奉孝聖憲皇后三次祝釐於此命葺治備太后臨幸並更清漪園爲頤和園太后許之既歸政奉太后駐焉歲十月十日太后萬壽節上率王大臣祝嘏以爲常十六年醇親王奕譞薨二十年日本侵朝鮮以太后命起恭親王奕訢是年太后六十萬壽上請在頤和園受賀仿康熙乾隆間成例自大內至園蹕路所經設彩棚經壇舉行慶典朝鮮軍事急以太后命罷之二十四

年恭親王奕訢薨上事太后謹朝廷大政必請命乃行願以國事日非思變法
救亡太后意不謂然積和左上期以九月奉太后幸天津閱兵訛言謂太后將
勒兵廢上又謂有謀圍頤和園劫太后者八月丁亥太后遽自頤和園還宮復
訓政以上有疾命居瀛臺養病二十五年十二月立端郡王載漪子溥儀繼穆
宗爲皇子二十六年義和拳事起載漪等信其術言於太后謂爲義民縱令入
京師擊殺德意志使者克林德及日本使館書記團使館德意志奧大利亞比
利時日斯巴尼亞美利堅法蘭西英吉利義大利日本和蘭俄羅斯十國之師
來侵七月逼京師太后率上出自德勝門道宣化大同八月駐太原九月至西
安命慶親王奕劻大學士總督李鴻章與各國議和二十七年各國約成八月
上奉太后發西安十月駐開封時端郡王載漪以庇義和拳得罪廢溥儀以公
銜出宮十一月還京師上仍居瀛臺養病太后屢下詔母子一心勵行新政三
十二年七月下詔預備立憲三十四年十月太后有疾上疾益增劇壬申太后
命授醇親王載灃攝政王癸酉上崩於瀛臺太后定策立宣統皇帝即日尊爲

太皇太后甲戌太后崩年七十四葬定陵東普陀峪曰定東陵初尊爲皇太后上徽號國有慶累加上曰慈禧端佑康頤昭豫莊誠壽恭欽獻崇熙皇太后及崩即以徽號爲諡子一穆宗

莊靜皇貴妃他他拉氏事文宗爲貴人累進麗妃穆宗尊封爲皇考麗皇貴太妃薨諡曰莊靜皇貴妃女一下嫁符珍玖貴妃徐佳氏事文宗爲貴人進玫嬪穆宗尊封爲皇考玖貴妃子一未命名殤

端恪皇貴妃佟佳氏事文宗爲祺嬪同治間尊爲皇考祺貴妃宣統初尊爲皇祖祺貴太妃薨諡曰端恪皇貴妃文宗諸妃未有子女而同治光緒兩朝尊封者婉貴妃璫妃吉妃禧妃慶妃雲嬪英嬪容嬪璿嬪玉嬪皆自貴人進封婉貴妃索綽絡氏雲嬪武佳氏英嬪伊爾根覺羅氏餘不知氏族

穆宗孝哲毅皇后阿魯特氏戶部尙書崇綺女同治十一年九月立爲皇后十三年十二月穆宗崩德宗即位以兩太后命封爲嘉順皇后光緒元年二月戊子崩梓宮暫安隆福寺二年五月御史潘敦儼因歲早上言請更定諡號謂后

崩在穆宗升遐百日內道路傳聞或稱傷悲致疾或云絕粒實生奇節不彰何以慰在天之靈何以副兆民之望太后以其言無據斥爲謬妄奪官五年三月合葬惠陵上諡宣統加諡曰孝哲嘉順淑慎賢明恭端憲天彰聖教皇后

淑慎皇貴妃富察氏穆宗立后同日封慧妃進皇貴妃德宗即位以兩太后命封爲敦宜皇貴妃進敦宜榮慶皇貴妃光緒三十年薨諡曰淑慎皇貴妃

莊和皇貴妃阿魯特氏大學士賽尚阿女孝哲毅皇后姑也事穆宗爲珣嬪進妃光緒間進貴妃宣統皇帝尊爲皇考珣皇貴妃孝定景皇后崩未逾月妃薨諡曰莊和皇貴妃敬懿皇貴妃赫舍里氏事穆宗自嬪進妃光緒間進貴妃宣統間累進尊封榮惠皇貴妃西林覺羅氏事穆宗自貴人進嬪光緒間進妃宣統間累進尊封

德宗孝定景皇后葉赫那拉氏都統桂祥女孝欽顯皇后姪女也光緒十四年十月孝欽顯皇后爲德宗聘焉十五年正月立爲皇后二十七年從幸西安二十八年還京師三十四年宣統皇帝即位稱兼祧母后尊爲皇太后上徽號曰

隆裕宣統三年十二月戊午以太后命遜位越二年正月甲戌崩年四十六上諡曰孝定隆裕寬惠愼哲協天保聖景皇后合葬崇陵

端康皇貴妃他他拉氏光緒十四年選爲瑾嬪二十年進瑾妃以女弟珍妃忤太后同降貴人二十一年仍封瑾妃宣統初尊爲兼祧皇考瑾貴妃遜位後進尊封歲甲子薨

恪順皇貴妃他他拉氏端康皇貴妃女弟同選爲珍嬪進珍妃以忤太后諭責其習尚奢華屢有乞請降貴人逾年仍封珍妃二十六年太后出巡沈於井二十七年上還京師追進皇貴妃葬西直門外移附崇陵追進尊封

宣統皇后郭博勒氏總管內務府大臣榮源女遜位後歲壬戌冊立爲皇后淑妃額爾德特氏同日冊封

論曰世祖聖祖皆以冲齡踐祚孝莊皇后觀創業之難而樹委裘之主政出王大臣當時無建垂簾之議者殷憂啓聖遂定中原克底於昇平及文宗末造孝貞孝欽兩皇后躬收政柄內有賢王外有名將相削平大難宏贊中興不幸穆

宗卽世孝貞皇后崩孝欽皇后聽政久稍稍營離宮修慶典視率祖奉孝莊皇后高宗奉孝聖皇后不逮十之一而世顧竊竊然有私議者外侮迭乘災沴屢見非其時也不幸與德宗意旨不協一激而啓戊戌之爭再激而成庚子之亂晚乃壹意變法怵天命之難諶察人心之將渙而欲救之以立憲百端並舉政急民煩陵土未乾國步遂改綜一代之興亡繫於宮闈嗚呼豈非天哉豈非天哉

清史稿

列傳二

諸王

有明諸藩分封而不錫土列爵而不臨民食祿而不治事史稱其制善清興諸子弟但稱台吉貝勒既乃數明建親郡王而次以貝勒貝子又次以公爵復別爲不入八分蓋所以存國俗而等殺既多屏衛亦益廣下此則有將軍無中尉又與明小異諸王不錫土而其封號但予嘉名不加郡國視明爲尤善然內襄政本外領師干與明所謂不臨民不治事者乃絕相反國初開創櫛風沐雨以百戰定天下翳諸王是庸康熙間出討三藩勝負互見而卒底蕩平之績其後行師西北仍以諸王典兵雍正乾隆諒闇之始重臣宅揆亦領以諸王嘉慶初以親王爲軍機大臣未幾以非祖制罷穆宗踐阼輟贊襄之命而設議政王尋仍改直樞廷自是相沿爰及季年親貴用事以攝政始以攝政終論者謂有天焉誠一代得失之林也今用諸史例以皇子爲宗子孫襲爵者從焉子孫別有功績復立爵者亦從焉其爵世備書之其爵不世則具詳於表表曰皇子傳曰

通達郡王雅爾哈齊

篤義剛果貝勒巴雅喇

景祖五子翼皇后生顯祖諸子武功郡王禮敦慧哲郡王額爾袞宣獻郡王齋堪恪恭貝勒塔察篇古皆不詳其母氏

武功郡王禮敦景祖第一子也肇祖而下世系始詳事蹟未備四傳至興祖興祖六子長德世庫次劉闡次索長阿次景祖次包朗阿次寶實號甯古塔貝勒景祖承肇祖舊業居赫圖阿拉德世庫居覺爾察劉闡居阿哈河洛索長阿居河洛噶善包朗阿居尼麻喇寶實居章甲環赫圖阿拉而城近者五里遠者二十里互相衛寶實子阿哈納渥濟格與董鄂部長克轍巴顏有隙屢來侵索長阿子吳泰哈達萬汗壻也乞援於哈達攻董鄂部取數寨董鄂部兵乃不復至甯古塔亦自此稍弱及太祖兵起德世庫劉闡索長阿寶實等子孫悉其英武屢欲加害其後益強大謀始戢索長阿寶實子孫皆從攻戰包朗阿雲孫拜山

尤有功自有傳帝業既成景祖諸兄弟追封皆未及禮敦生而英勇景祖討平碩色納奈呼二部禮敦功最號曰巴圖魯太祖兵起禮敦卒久矣太祖既定東京葬景祖顯祖於楊魯山以禮敦陪葬崇德四年八月進封武功郡王配享太廟子貝和齊太祖伐明攻廣寧留守遼陽孫色勒事太祖授牛彖額眞事太宗自十六大臣進八大臣授正藍旗固山額眞從太宗圍大凌河軍城南屢擊敗明兵又從太宗略宣府大同與貝勒德格類入獨石口敗明兵於長安嶺攻赤城克其郭尋坐事降鑲黃旗梅勒額眞崇德初從伐朝鮮朝鮮國王李倬遣妻子入江華島走保南漢山城豫親王多鐸圍之急朝鮮將赴援色勒與甲喇額眞阿爾津擊敗之分兵攻江華島色勒率右翼兵渡海越敵艦近躍登島破其守兵得倬妻子倬既降論功授牛彖章京世職兼吏部右參政順治元年擢內大臣錄禮敦諸孫席賚阿濟賚阿賚等並授拜他喇布勒哈番色勒進一等阿思哈尼哈番再進二等精奇尼哈番擢領侍衛內大臣卒諡勤愍阿賚子吉哈禮自有傳

慧哲郡王額爾袞景祖第二子順治十年追封諡配享太廟

宣獻郡王齊堪景祖第三子當族人與太祖構難齊堪與額爾袞皆不與順治十年追封諡配享太廟

恪恭貝勒塔察篇古景祖第五子順治間追封諡天聰九年詔德世庫等子孫以覺羅爲氏繫紅帶乾隆四十年詔國史館禮敦等傳列諸臣之首以別於宗室諸王

顯祖五子宣皇后生太祖莊親王舒爾哈齊通達郡王雅爾哈齊繼妃納喇氏生篤義剛果貝勒巴雅喇庶妃李佳氏生誠毅勇壯貝勒穆爾哈齊

誠毅勇壯貝勒穆爾哈齊顯祖第二子驍勇善戰每先登陷陳歲乙酉從太祖伐哲陳部值大水遣衆還留八十人被棉甲者五十被鐵甲者三十行略地加哈人蘇枯賴虎密以告於是托漠河章甲把爾達撤爾湖界凡五城合兵禦我後哨章京能古德馳告上山他道弗遇上深入遙望見敵兵八百餘陳渾河至於南山包朗阿孫札親桑古里懼敵衆解其甲授人上呵之穆爾哈齊及左右

顏布祿兀浚噶從上馳近敵陳下馬奮擊射殺二十餘人敵渡渾河走穆爾哈齊復從上躡敵後至吉林崖遙見敵兵十五自旁徑來上去冒上纓隱而待射其前至者貫脊殪穆爾哈齊復射殪其一餘皆墜崖死上曰今日以四人敗八百人天助我也穆爾哈齊屢從征伐賜號青巴圖魯譯言誠毅天命五年九月卒年六十上臨祭其墓順治十年追封諡子十一有爵者六達爾察務達海漢岱塔海祜世塔喇世塔達爾察塔海祜世塔喇世塔皆封輔國公達爾察諡剛毅喇世塔諡恪僖襲敏貝子務達海穆爾哈齊第四子事太宗授牛叅章京崇德元年從睿親王多爾袞伐明攻沙河南和及臨洺關魏縣並有功三年授刑部左參政從貝勒岳託敗明兵開平復偕固山額真何洛會等敗明兵沙河三河又敗之渾河岸至趙州復攻山東克臨清安邱臨淄還次密雲俘四千餘五年授鑲白旗滿洲梅勒額真從攻錦州夜略杏山塔山七年擢刑部承政從伐明分軍略登州未至先歸坐奪俘獲入官順治元年從定京師逐李自成至延安城兵夜出擊破之復從豫親王多鐸徇江南三年又從討蘇尼特騰機思敗

土謝圖汗碩雷汗援兵五年偕固山額真阿賴等戍漢中累進爵自三等輔國將軍至貝子六年偕鎮國公屯齊哈輔國公巴布泰代英親王阿濟格討叛將姜瓖八年攝都察院事十一年從鄭親王世子濟慶討鄭成功中道疾作召還十二年卒諡襄敏務達海子托克托慧封鎮國公托克托慧子揚福事聖祖官黑龍江將軍久聖祖屢稱之命襲不入八分鎮國公卒諡襄毅揚福子三官保聖祖褒其孝即命繼揚福署黑龍江將軍襲爵漢岱穆爾哈齊第五子事太宗與務達海同授牛莊章京崇德六年從上圍松山擊破明總兵吳三桂王樸七年從貝勒阿巴泰伐明攻薊州河間景州進克兗州即軍前授兵部承政順治元年從入關擊李自成又從多鐸西征破自成潼關二年與梅勒額真伊爾德率兵自南陽趨歸德克州一縣四渡淮克揚州賜金二十五兩銀千三百兩三年授鑲白旗滿洲固山額真與貝勒博洛徇杭州進攻台州擊明魯王以海分兵略福建攻分水關破明唐王將師福入崇安斬所置巡撫楊文英等下興化漳州泉州五年從貝子屯齊將兵討陝西亂回亂定與英親王阿濟格合軍討

叛將姜瓖六年從巽親王滿達海克朔州甯武移師攻遼州下長留襄垣榆社武鄉諸縣七年授吏部尙書正藍旗滿洲固山額真八年調刑部累進爵自一等奉國將軍至鎮國公九年復調吏部從定遠大將軍尼堪下湖南尼堪戰沒坐奪爵十二年復授吏部尙書加太子太保授鎮國將軍品級十三年四月坐依阿蒙蔽奪官爵卒漢岱子海蘭席布錫倫嵩布圖均封輔國公海蘭諡愍厚席布錫倫諡悼敏嵩布圖諡懷思

莊親王舒爾哈齊顯祖第三子初爲貝勒斐悠城長策穆特黑苦烏喇之虐願來附太祖令舒爾哈齊及貝勒褚英代善諸將費美東揚古利常書侍衛扈爾漢納齊布將三千人往迎之夜陰晦軍行難有光舒爾哈齊曰吾從上行兵屢矣未見此異其非吉兆耶欲還兵褚英代善不可至蜚悠盡收環城屯寨五百戶而歸烏喇貝勒布占泰發兵萬人邀於路褚英代善力戰破之舒爾哈齊以五百人止山下常書納齊布別將百人從焉褚英代善既破敵乃驅兵前進繞山行未能多斬獲師還賜號達爾漢巴圖魯既論常書納齊布止山下不力戰

罪當死舒爾哈齊曰誅二臣與殺我同上乃宥之罰常書金百奪納齊布所屬自是上不遣舒爾哈齊將兵舒爾哈齊居恒鬱鬱語其第一子阿爾通阿第三子札薩克圖曰吾豈以衣食受羈於人哉移居黑扯木上怒誅其二子舒爾哈齊乃復還歲辛亥八月薨順治十年追封諡子九有爵者五阿敏圖倫泰桑武濟爾哈朗費揚武阿敏舒爾哈齊第二子歲戊申偕褚英伐烏喇克宜罕山城俘其衆以歸歲癸丑上伐烏喇布占泰以三萬人拒諸將欲戰上止之阿敏曰布占泰已出舍而不戰將奈何上乃決戰遂破烏喇天命元年與代善莽古爾泰及太宗並授和碩貝勒號四大貝勒執國政阿敏以序稱二貝勒四年明經略楊鎬大舉來侵阿敏從上擊破明兵薩爾滸山復禦明總兵劉綎於棟鄂路代善等繼之陳斬綎還擊明將喬一琦一琦奔固拉庫崖與朝鮮將姜功烈合軍阿敏攻之功烈降一琦自經死尋從上破葉赫六年從上取瀋陽遼陽鎮江城將陳良策叛附明將毛文龍阿敏遷其民於內地文龍屯兵朝鮮境阿敏夜渡鎮江擊殺其守將文龍敗走十一年伐喀爾喀巴林部取所屬屯寨伐札魯

特部俘其衆天聰元年太宗命偕貝勒岳託等伐朝鮮瀕行上命並討文龍師拔義州分兵攻鐵山文龍所屯地也文龍敗走進克定州渡嘉山江克安州平壤復進次中和朝鮮國王李倬使迎師阿敏與諸貝勒答書數其罪有七力拒之師復進次黃州倬復遣使來阿敏欲遂破其都城諸貝勒謂宜待其大臣至莅盟許平總兵李承芳進曰我等奉命仗義而行前已遣書言遣大臣進昌君即班師背之不義阿敏怒叱之退師復進次平山倬走江華島遣其臣進昌君至軍阿敏令吹角督進兵岳託乃與濟爾哈朗駐平山遣副將劉興祚入江華島責倬倬遣族弟原昌君覺等詣軍爲設宴宴畢岳託議還師阿敏曰吾恒慕明帝及朝鮮王城郭宮殿今既至此何遽歸耶我意當留兵屯耕杜度與我叔姪同居於此杜度變色曰上乃我叔我何肯遠離何爲與爾同居濟爾哈朗亦力阻諸貝勒乃定議許倬盟阿敏縱兵掠三日乃還上迎勞於武靖營賜御衣一襲復從上伐明圍錦州攻甯遠斬明步卒千餘四年師克永平灤州遷安遵化上命阿敏偕貝勒碩託將五千人駐守阿敏駐永平分遣諸將分守三城諭

降榛子嶺明經略係承宗督兵攻溧州阿敏遣數百人赴接收遷安守兵入永平明兵攻溧州急溧州守將固山額真圖爾格等不能支棄城奔永平明兵截擊師死者四百餘阿敏令遵化守將固山額真察哈喇等亦棄其城遂盡殺明將吏降者屠城民收其金帛夜出冷口東還上方遣貝勒杜度赴援聞阿敏等棄四城而歸上御殿集諸貝勒大臣宣諭罪阿敏等阿敏等至今屯距城十五里復宣諭詰責上念士卒陷敵感傷墮淚越三日召諸貝勒大臣集闕下上御殿令貝勒岳託宣於衆曰阿敏怙惡久矣當太祖時嗾其父欲移居黑扯木太祖坐其父子罪旣而宥之其父旣終太祖愛養阿敏如己出授爲和碩貝勒及上嗣位禮待如初師征朝鮮旣定盟受質不願班師欲與杜度居王京濟爾哈朗力諫乃止此阿敏有異志之見端也俘美婦進上旣復自求之上察其缺望曰奈何以一婦人乖兄弟之好以賜總兵冷格里伐察哈爾土謝圖額駙背約與通好上怒絕之阿敏遣以甲冑鞍轡且以上語盡告之諸貝勒子女婚嫁必聞上阿敏私以女嫁蒙古貝勒塞特爾及宴上不往常懷怨憤太祖時守邊駐

防原有定界乃越界移駐黑扯木上責以擅棄汛地將有異志阿敏不能答上出征令阿敏留守惟耽逸樂屢出行獵岳託豪格出師先還坐受其拜儼如國君及代守永平安曰既克城何故不殺其民又明告衆兵曰我既來此豈能令爾等不飽欲而歸略榛子鎮盡掠其財物又驅降人分給八家爲奴明兵圍灤州三晝夜擁兵不親援屠永平遷安官民悉載財帛牲畜以歸毀壞基業故令我軍傷殘命衆議其罪僉曰當誅命幽之留莊六所園二所奴僕二十羊五百牛二十餘財產悉畀濟爾哈朗崇德五年十一月卒於幽所阿敏子六有爵者五愛爾禮固爾瑪琿恭阿果蓋果賴愛爾禮果蓋果賴皆封鎮國公愛爾禮坐罪死果蓋設端純溫簡貝子固爾瑪琿崇德間從多爾袞伐明自京師入山西境復東至濟南克城四十餘封輔國公阿敏得罪奪爵削宗籍順治五年復封輔國公上以其貧乏賜白金三千從濟爾哈朗徇湖廣破何騰蛟師復進攻永興奪門入敗明兵進貝子康熙二十年卒諡溫簡鎮國襄敏公瓦三固爾瑪琿子事聖祖初封輔國將軍從岳託定湖廣襲輔國公二十一年授右宗人追論

攻長沙退縮罪奪官仍留爵復授鑲藍旗滿洲固山額真俄羅斯侵據雅克薩
上遣瓦三偕侍郎果不魯黑龍江將軍薩布素按治尋命固山額真朋春等率
師討之以瓦三統轄黑龍江將士二十四年卒諡襄敏瓦三子齊克塔哈襲輔
國公事聖祖征噶爾丹在行歷右宗人都統領侍衛內大臣坐事奪爵以固爾
瑪琿孫鄂斐襲征噶爾丹亦在行卒以子鄂齊襲事世宗嘗奉使西藏宣諭達
賴喇嘛進鎮國公授天津水師都統坐不能約束所部奪爵復起授都統坐納
賂再奪爵恭阿亦以阿敏得罪與固爾瑪琿同譴尋同還宗籍順治五年同徇
湖廣克六十餘城封鎮國公六年卒於軍鄭獻親王濟爾哈朗舒爾哈齊第六
子幼育於太祖封和碩貝勒天命十一年伐喀爾喀巴林部扎哈特部並有功
天聰元年伐朝鮮朝鮮國王李倬既乞盟阿敏仍欲攻其國都岳託邀濟爾哈
朗議濟爾哈朗曰吾等不宜深入當駐兵平山以待卒定盟而還五月從上伐
明圍錦州偕莽古爾泰擊敗明兵復移師南遠與明總兵滿桂遇裏創力戰大
敗其衆二年五月偕豪格討蒙古固特塔布囊戮之收其衆歸三年八月伐明

錦州甯遠焚其積聚十月上率師自洪山口入濟爾哈朗偕岳託攻大安口夜毀水門以進擊明馬蘭管援兵及旦明兵立二營山上濟爾哈朗督兵追擊五戰皆捷降馬蘭營馬蘭口大安口三營引軍趨石門寨殲明援兵寨民出降會師避化薄明都徇通州張家灣四年正月從上圍永平擊斬叛將劉興祚獲其弟興賢既克永平興貝勒薩哈璘駐守察倉庫閱士卒置官吏傳檄下灤州遷安三月阿敏代戍乃引師還五年七月初設六部濟爾哈朗掌刑部事從上圍大凌河濟爾哈朗督兵收近城臺堡六年五月從征察哈爾還趨歸化城收其衆千餘人七年三月城岫巖五月明將孔有德耿仲明自登州來降明總兵黃龍以水師邀之朝鮮兵與會濟爾哈朗與貝勒阿濟格等勒軍自鎮江迓有德等明兵引去崇德元年四月封和碩鄭親王三年五月攻甯遠薄中後所城明兵不敢出移師克模龍關及五里堡屯臺四年五月略錦州松山九戰皆勝俘其衆二千有奇五年三月脩義州城蒙古多羅特部蘇班岱阿爾巴岱附於明屯杏山五里臺請以三十戶來歸上命率師千五百人迎之戒曰明兵見我寡

必來戰可分軍爲三隊以行夜過錦州至杏山使潛告蘇班岱等携輜重以行
旦明杏山總兵劉周智與錦州松山守將合兵七千逼我師濟爾哈朗縱師入
敵陣大敗之賜御廐良馬一九月圍錦州設伏城南敵不進追擊破之六年三
月復圍錦州立八營掘壕築塹以困大壽大壽以蒙古兵守外郭台吉諾木齊
等遣人約獻東關爲大壽所覺與之戰濟爾哈朗督兵薄城蒙古兵縋以入據
其郭遷蒙古六千餘人於義州降明將八十餘上御篤恭殿宣捷四月敗明援
兵五月又敗之斬級二千六月師還九月復圍錦州十二月洪承疇自松山遣
兵夜犯我軍我軍循壕射之敵敗去不得入盡降其衆七年再圍錦州三月大
壽降墮松山塔山杏山三城以歸賜鞍馬一嶧綬百八年世祖即位命與睿親
王多爾袞同輔政九月攻寧遠拔中後所並取中前所順治元年王令政事先
白睿親王列銜亦先之五月睿親王率師入山海關定京師十月封爲信義輔
政叔王賜金千銀萬緡千正四年二月以府第踰制罰銀二千罷輔政五年三
月貝子屯齊尙善屯齊喀等許王諸罪狀言王當太宗初喪不舉發大臣謀立

肅親王豪格召王就質議罪當死遂興大獄勳臣額亦都費英東揚古利諸子姪皆連染議罪當死籍沒既改從輕比王坐降郡王肅親王豪格遂以幽死閏四月復親王爵九月命爲定遠大將軍率師下湖廣十月次山東降將劉澤清以叛誅六年正月次長沙明總督何騰蛟總兵馬進忠陶養用等合李自成餘部一隻虎等據湖南王分軍進擊拔湘潭擒騰蛟四月次辰州一隻虎遁走克寶慶破南山坡大水洪江諸路兵凡二十八營七月下靖州進攻衡州斬養用遂敵至廣西全州分軍下道州黎平及烏撒土司先後克六十餘城七年正月師還賜金二百銀二萬八年二月偕異親王滿達海端重親王博洛敬謹親王尼堪奏削故睿親王多爾袞附語詳睿親王傳三月以王老免朝賀謝恩行禮九年二月進封叔和碩鄭親王十二年二月疏言太祖創業之初日與四大貝勒五大臣討論政事得失咨訪士民疾苦上下交孚鮮有壅蔽故能掃清羣雄肇興大業太宗繼承大統亦時與諸王貝勒講論不輟崇獎忠直錄功棄過凡詔令必求可以順民心垂久遠者又慮武備廢弛時出射獵諸王貝勒置酒高

譙以優戲爲樂太宗怒曰我國強興治弓矢繕甲兵視將士若赤子故人爭效死每戰必克常恐後世子孫棄淳厚之風沿習漢俗卽于惰淫今若輩爲此荒樂欲國家隆盛其可得乎遣大臣索尼再三申諭今皇上詔大小臣工盡言臣以爲平治天下莫要於信前者軫恤滿洲官民間者惟忤嗣役脩乾清宮詔令不信何以使民伏祈效法太祖太宗時與大臣詳究政事得失必商榷盡善然後布之詔令庶幾法行民信紹二聖之休烈抑請者垂謨昭德莫先于史古聖明王進君子遠小人措天下於太平垂鴻名于萬世鑒史官是賴今宜設起居注官置之左右一言一行傳之無窮亦治道之助也疏上嘉納之五月疾革上臨問奏臣受三朝厚恩未及答願以取雲貴殄桂王統一四海爲念上垂涕曰天奈何不令朕叔長年耶言已大慟命工圖其像翼日薨年五十七輟朝七日賜銀萬置守園十戶立碑紀功康熙十年六月追諡乾隆四十三年正月詔配享太廟復嗣王封號曰鄭濟爾哈朗子十一有爵者四富爾敦濟度勒度巴爾堪富爾敦濟爾哈朗第一子封世子順治八年卒諡愍厚簡純親王濟度濟爾

哈喇第二子初封簡郡王富爾敦卒封世子十一年十一月命爲定遠大將軍率師討鄭成功十二年九月次福州久之進次泉州十三年六月成功將黃梧蘇明鄭純自海澄來降移軍次漳州俄成功犯福州遣梅勒額眞阿克善等赴援擊敗之斬二百餘級復擊斬其將林祖蘭等奪其舟十有四又分軍攻惠安閩安漳浦獲舟數百斬二千餘級十四年三月師還上遣大臣迎勞蘆溝橋始聞鄭獻親王之喪令入就喪次上臨其第慰諭之五月襲爵改號簡親王十七年薨濟度子五喇布德塞雅布先後襲爵簡親王喇布濟度第二子濟度初薨以第三子德塞襲康熙九年薨諡曰惠是年喇布襲爵吳三桂反十三年九月命爲揚威大將軍率師駐江甯十四年九月移師江西鎮南昌屢遣兵援東鄉擊鄱陽破金谿萬年三桂將高得捷韓大任陷吉安詔趣進師喇布駐南昌不出師攻吉安屯螺子山敵來攻師敗績上遣侍郎班迪按敗狀喇布乃督師圍吉安十六年三月敵引走喇布入吉安疏稱大任等屯甯都請降詔報可旣而大任自甯都出擾萬安泰和喇布復請增兵上諭曰簡親王喇布自至江西無

尺寸之功深居會城虛糜廩餉迨赴吉安以重兵圍城而韓大任竄逸竊踞甯都復擾萬安泰和不能擊滅喇布所轄官兵爲數不爲少乃一大任不能剿除宜嚴加處分俟事平日議罪十七年正月護軍統領哈克三等敗大任于老虎洞燬其壘斬六千級大任奔福建詣康親王傑書軍降二月移師湖南駐茶陵八月三桂死於衡州詔令自安仁進師十八年正月進復衡州二月分軍復祁陽耒陽寶慶九月進次廣西駐桂林十九年正月馬承廕以柳州叛五月進攻柳州承廕降八月移駐南甯十月詔選所部付大將軍賚塔進攻雲南二十年八月召還京師十月薨二十一年追論吉安失機罪奪爵雅布濟度第五子二十二年襲二十七年命赴蘇尼特防噶爾丹二十九年噶爾丹深入烏珠穆沁地以恭親王常甯爲安北大將軍雅布與信郡王鄂扎副之出喜峯口既而罷行詔赴裕親王福全軍參贊軍務八月擊敗噶爾丹於烏蘭布通噶爾丹遁未窮追師還議不追敵罪當奪爵詔爵俸三年三十五年從上親征三十八年掌宗人府事四十年薨諡曰修子十五雅爾江阿神保住先後襲爵雅爾江阿雅

布第一子初封世子四十二年襲雍正四年詔責雅爾江阿耽飲廢事奪爵神保住雅度第十四子初封鎮國將軍雅爾江阿既黜世宗命襲爵乾隆十三年詔責神保住恣意妄爲致兩目成眚又虐待兄女奪爵以濟爾哈朗弟貝勒費揚武曾孫德沛襲德沛字濟齊貝子福存子雍正十三年授鎮國將軍以果親王允禮薦世宗召見問所欲對曰願厠孔廡分特豚之饋上大重之授兵部侍郎乾隆元年改古北口提督二年授甘肅巡撫奏言甘肅州縣多在萬山中遇災民入城領賑路窵遠宜於鄉鎮設廠散糧並許州縣吏具詳即施賑旋擢湖廣總督奏言治苗疆宜勸墾田置學校並諭令植樹四年調閩浙總督御史朱續暉劾福建巡撫王士任賊私上疑不實命續暉會鞠德沛自承失察直續暉而奪士任官時服其公福州將軍隆昇貪縱劾去之奏言海濱居民恆械鬥宜酌移鎮將營汛預弭爭端五年十二月諭曰德沛屢任封疆操守廉潔一介不取逋負日積致獨舊產賜福建藩庫銀一萬以風有位六年兼署浙江巡撫七年調兩江總督淮揚大水令府縣發倉庫奏撥地丁關稅鹽課銀十萬兩治賑

尋議河事與高斌不合八年轉吏部侍郎十二年五月署山西巡撫十二月擢吏部尙書十三年七月以疾解任神保住既黜上以德沛操履厚重特命襲爵曾祖貝勒費揚武祖貝子傅喇塔及福存並追封簡親王十七年薨諡曰儀以濟爾哈朗曾孫奇通阿襲奇通阿輔國公巴賽子初授輔國將軍襲輔國公乾隆元年授正紅旗滿州都統三年授領侍衛內大臣十七年襲祖輔國公巴爾堪父巴賽並追封簡親王二十一年掌宗人府事二十八年薨諡曰勤子豐訥亨襲豐訥亨初授三等侍衛事高宗從師討準噶爾將健銳千人屯呼爾琿霍集占以五千人來犯合諸軍擊却之逐北十餘里師進敵踞塹以拒戰奪塹所乘馬中創易馬再進敗敵沁達勒河渡口再敗敵葉爾羌河岸詔嘉其勇遷二等侍衛擢鎮白旗滿洲副都統移軍伊犁授領隊大臣擊破瑪哈沁及哈薩克部人收其馬二十七年師還賜雙眼孔雀翎遷護軍統領管健銳營二十八年襲爵授都統掌宗人府事四十年薨諡曰恪子積哈納襲四十二年正月復號鄭親王四十九年薨諡曰恭子烏爾恭阿襲烏爾恭阿初名佛爾果崇額襲爵

詔改名道光二十六年薨諡曰愼子端華襲授御前大臣宣宗崩受顧命文宗即位迭命爲閱兵大臣右宗正京師戒嚴令督察巡防十年扈上幸熱河授領侍衛內大臣端華弟肅順用事文宗崩再受顧命與怡親王載垣及肅順等並號贊襄政務王大臣穆宗還京師詔責端華等專擅跋扈罪端華坐賜死肅順自有傳爵降爲不入分輔國公同治元年二月以濟爾哈朗八世孫岳齡襲三年七月克復江甯復還鄭親王世爵以奇通阿五世孫承志襲承志輔國公西朗阿子初襲輔國公既襲王爵曾祖輔國公經訥亨祖輔國公伊豐額及西朗阿並追封鄭親王而以岳齡改襲輔國公四年二月御史劉慶劾承志品行不端詔令力圖湔濯十一年坐令護衛王壽殿殺主事福珣奪爵圈禁以積哈納孫慶至襲慶至奉恩將軍松德嗣子既襲王爵松德追封鄭親王慶至光緒四年薨諡曰順子凱泰襲二十六年薨諡曰恪子昭煦襲勒度濟爾哈朗第三子封敏郡王薨諡曰簡無子爵除輔國武襄公巴爾堪濟爾哈朗第四子初授輔國將軍康熙十三年吳三桂據湖南令巴爾堪率師赴兗州署梅勒額真進次

江甯耿精忠遣兵犯徽州詔巴爾堪進勦九月次旌德聞績溪陷疾趨過徽嶺
破敵江甯將軍額楚繼至合師逐北斬三千餘級克徽州復破敵黟縣並亭橋
進攻婺源復破敵於奇台嶺於黃茅嶺復婺源進克樂平擊破叛將陳九傑
乘勝下饒州十四年攻萬年石頭街敵四萬人禦渡口水陸並進破五十七營
斬五千級擒九傑克安仁敵焚舟走五月復貴溪進略弋陽攻永豐十六年正
月敗於螺子山議奪官借額楚徇廣東九月戰韶州蓮花山陷陣中流矢裹創
力戰大破敵十九年八月喇布師次廣西上命以巴爾堪從病作語固山額真
額赫納等曰吾不能臨陣而死今創發勿令家人以陣亡冒功也遂卒于軍喪
還上命內大臣輝塞往奠下部議卹雍正元年追封諡子巴賽襲輔國襄愍公
巴賽事聖祖授鑲藍旗漢軍副都統從征噶爾丹遷正紅旗蒙古都統署黑龍
江將軍世宗卽位授甯古塔將軍既襲爵召還雍正四年授振武將軍軍阿爾
台五年當代還以喀爾喀郡王丹津多爾濟言巴賽治事整飭命留防七年靖
邊大將軍傅爾丹率師討噶爾丹策零授巴賽副將軍八年傅爾丹入覲護大

將軍印九年倍傳爾丹駐科布多六月噶爾丹策零以三萬人來犯傅爾丹信問言噶爾丹策零兵寡遂出師次庫列圖嶺敵據險攻之不克移軍和通呼爾哈諾爾敵伏山谷突起截戰蒙古兵潰收滿洲兵四千作方營保輜重退度哈爾哈納河敵追至傅爾丹還科布多巴賽與副將軍查弼納率殘兵越嶺至河濱禦敵沒於陳噶爾丹策零之衆旌黃帶示我師曰汝宗室爲我所殺矣賜卹諡祀昭忠祠子奇通阿襲尋改襲簡親王公爵當除高宗以巴爾堪巴賽仍世有戰功以奇通阿次子經訥亨襲四傳至曾孫承志復改襲鄭親王靖定貝勒費揚武一名芬古舒爾哈齊第六子天聰五年授鑲藍旗固山額真從上伐明攻大凌河城費揚武率本旗兵圍其西南上幸阿濟格營城兵突出費揚武擊敗之上令諸軍向錦州幟而馳若明援兵至者以致祖大壽費揚武迎擊大壽敗入城遂不敢出八年再從伐明師進獨石口克長安嶺攻赤城克其郭九年師入山西上命費揚武等攻寧錦緩明師大壽軍大凌河西擊敗之崇德元年伐明克城十是冬伐朝鮮敘功封固山貝子四年坐受外藩蒙古賄削爵尋復

封輔國公七年伐明敗明總兵白騰蛟等於薊州克其城八年代戊錦州十二月卒順治十年追封諡費揚武子七有爵者三尙善傳喇塔努賽努賽封貝子諡悼哀尙善初襲輔國公順治元年進貝子二年從多鐸南征擊李自成敵以騎兵三百衝我師尙善擊敗之平河南下江南並有功賜圓補紗衣一襲金百銀五千鞍馬一五年戊大同六年進貝勒掌理藩院爲議政大臣十五年從多尼征雲南明桂王由榔奔永昌尙善進鎮南州破其將白文選於玉龍關渡瀾滄江下永昌由榔先遁乘勝取騰越進南甸至孟村而還十六年賜蟒袍一玲瓏刀一鞍馬一十七年追論尙善撤永昌守兵致軍士入城傷人罪降貝子康熙十一年復爵任右宗正以疾罷吳三桂反授安遠靖寇大將軍率師之岳州尙善至軍移書三桂曰王以亡國餘生乞師我朝殄殲賊寇雪國恥復父讐蒙恩眷禮列爵分藩富貴榮寵迄今三十餘年矣而晚節末路自取顛覆竊爲王不解也王今藉口興復明室曩者大兵入關不聞請立明裔天下大定猶爲我計除後患翦滅明宗安在其爲故主效忠哉將爲子孫期大業則公主額駙入

渙之時何不即萌反側至遣子入侍乃復稱兵以陷子於戮可謂慈乎若謂光耀前人則王之投誠也祖考皆膺封錫今則墳塋毀棄骸骨遺於道路可謂孝乎爲人臣僕身事兩朝而未嘗忠於一主可謂義乎躬蹈四罪而猶逞志角力謬欲收拾人心是厝薪於火而云安結果於幕而云固也聖朝寬大如輪誠悔罪應許自新毋蹈公孫述彭寵故轍赤族湛身爲世大僂三桂得書不報尙善疏請發荊州綠營兵京口沙唬船五十進攻岳州十四年遣舟師絕敵餉道十五年敗賊於洞庭取君山分兵助攻長沙十六年四月三桂奔衡州復出湘潭分遣其衆侵兩粵十七年詔責尙善師無功令率所部駐長沙而以岳樂統大軍取岳州尙善請率舟師克岳州自效上從之三桂將杜輝等犯柳林甯師迎擊舟師來會合戰輝敗走八月卒於軍十九年追論退縮罪削貝勒聖祖念尙善舊勞授其子門度輔公國世襲惠獻貝子傳喇塔費揚武第四子初封輔國公順治二年從勒克德渾徇湖廣有功賜金五十銀千五年復征湖廣逐敵至廣西賜銀六百六年進貝子十六年以朝參失儀降輔國公十八年復爵康熙

十三年耿精忠反授寧海將軍佐康親王傑書討之師至浙江溫州處州皆陷傅喇塔師進台州戰黃瑞山擊斬精忠將陳鵬等復破敵天台紫雲山十四年精忠將會養性再犯台州師自仙居襲其後破之乘勝圍黃巖養性遁城降先後復太平樂清青田諸縣進攻溫州破敵南江十五年精忠兵四萬水陸來犯師分路迎擊斬其將三百兵二萬有奇初傅喇塔之攻溫州也以待紅衣礮爲辭繼言須戰船傑書疏聞上責其言先後歧命尅期取溫州傅喇塔疏言臣奉康親王檄催心思皇惑語言違謬臣前駐台州王云待破台州進福建臣得黃巖又云必取溫州以是責臣臣將無辭今蒙恩勅期下溫州敢不戮力但瓊溫州皆水我軍不能猝入上命康親王留兵圍溫州而趣傅喇塔率師自衢州規福建諡曰王貝子皆朕懿親受命討賊師克在和宜同心合力以奏膚功於是傅喇塔亦留兵圍溫州而自率師攻處州溯江抵得勝山養性等以數百艘泊江中復立兩營對江及得勝山下古溪阻我師傅喇塔遣攻古溪伏林中敵敗伏起截殺並發礮碎敵舟及對江營師進次溫溪渡口敗精忠將馬成龍尋會

傑書師于衢州精忠兵屯雲和石塘嶺擊之破其壘二十八克雲和九月師入
福建精忠降浙江諸寇悉平十一月卒于軍喪歸賜祭奠諡忠獻子富善仍襲
貝子授左宗人以病解任諭責富善乖亂奪爵弟福存襲卒子德普襲鎮國公
授左宗人卒子恒魯襲輔國公事高宗歷工部侍郎左宗人綏遠盛京將軍授
內大臣卒諡恭懿子興兆襲輔國公事高宗從征金川爲領隊大臣歷右宗人
荊州將軍攻富鳴拉得黑絨布樂卡卡角諸地有功金川平畫像紫光閣歷西
安綏遠城將軍坐事奪官復授荊州將軍苗石柳鄧吳牛生吳八月等爲亂與
提督花連布擊吳牛生降與內大臣額勒登保等擊吳八月復擊石柳鄧殲焉
屢荷恩賈嘉慶初討教匪姚之富齊王氏等師久無功奪官戍烏魯木齊復授
侍衛駐和闐塔爾巴哈臺坐事復奪官子孫仍以輔國公世襲錄傳喇塔功也
舒爾哈齊諸孫札喀納屯齊洛托皆有功受封札喀納札薩克圖子崇德二年
八月睿親王多爾袞率師伐明毀邊牆至涿州分軍八道入扎喀納趨臨清州
渡運河破濟南還破天津衛所向有功四年師還賜駝馬各一銀二千封鎮國

公上命追蒙古漢人之逃亡者札喀納以泥淖不追而還降輔國公六年從上
攻錦州明總督洪承疇以兵犯鎮紅旗營擊敗之罷戰敵襲我後距百步而近
札喀納奮力轉戰敵驚遁復偕輔國公費揚武追擊明將吳三桂白廣恩王樸
等於塔山七年成錦州追論敏惠恭和元妃喪時札喀納從武英郡王阿濟格
歌舞爲樂大不敬削爵黜宗籍幽禁順治初釋之從多爾袞敗李自成復宗籍
授輔國公品級偕鎮國公傅勒赫戍江南復從平南大將軍勒克德渾徇湖廣
師還賜金五十銀千五年從郡王瓦克達赴英親王阿濟格軍戍大同六年進
貝子九年從定遠大將軍尼堪征湖南賜蟒衣鞍馬弓矢至衡州尼堪戰歿上
以貝勒屯齊與札喀納合領其軍敗明兵於周家坡十一年追論衡州敗績罪
奪爵十二年復授輔國公品級十五年從定遠靖寇大將軍多尼徇雲南克永
昌十六年閏三月卒於軍子瑪喀納襲三等鎮國將軍品級屯齊圖倫子圖倫
舒爾哈齊第四子追封貝勒諡恪僖屯齊事太宗從英親王阿濟格伐明有功
從鄭親王濟爾哈朗略錦州松山杏山九戰九勝屯齊受創加賜銀百封輔國

公五年從睿親王多爾袞圍錦州明兵夜襲鎮藍旗營擊敗之坐不臨城及私遣兵還議削爵命爵銀千六年從上攻錦州塔山敗明兵復從多爾袞圍錦州順治元年進貝子尋從豫親王多鐸破流寇平陝西河南並有功賜圓補紗衣一襲從多鐸下江甯明福王由崧走太平與貝勒尼堪追至蕪湖獲之帥還賜金百銀五千鞍馬一授鎮藍旗滿洲固山額真三年從肅親王豪格西征破賀珍解漢中圍會一隻虎孫守法陷興安進師漢陰擊走之五年陝西回亂命爲平西大將軍率師討之總督孟喬芳已擊斬回酋米喇印丁國棟等還赴英親王阿濟格軍戍大同六年進貝勒張獻忠將孫可望李定國等降於明桂王由榔擾湖南九年屯齊從定遠大將軍尼堪南征尼堪戰歿以屯齊代將時定國及別將馬進忠率兵四萬餘屯永州定國聞師至度龍虎關先遁可望在靖州別將馮雙禮在武岡屯齊進師寶慶至周家坡雙禮進忠據險抗我師會暮天雨列陣相拒其夜可望自寶慶以兵來會衆號十萬屯齊分兵縱擊大破之十一年追坐衡州敗績削爵十二年授鎮國公品級十五年從多尼徇雲南定國

挾山榔奔永昌降其餘衆還康熙二年卒子溫齊初封貝子授右宗人鑲藍旗滿洲都統吳三桂反上命定西大將軍董額自陝西徇四川溫齊從陝西提督王輔臣叛應三桂師駐漢中十四年進次隴州克仙逸關山二關復秦州禮縣逐敵至西和清水伏羌並下十六年詔責董額師久無功溫齊亦坐降輔國公奪官三桂陷湖南安遠靖寇大將軍尙善規岳州上發禁旅命溫齊率以往參贊軍務十七年敗賊於柳林鰲於君山於陸石口進克岳州十八年溫齊追三桂將吳應麒以未搆斃具引還且妄報陣斬五千餘級時尙善已卒察尼代將事聞命察尼按勒之溫齊坐削爵洛託寨桑武子寨桑武舒爾哈齊第五子追封貝勒謚和惠洛託天聰八年從太宗伐明上駐師大同南山西岡洛託籍所俘以獻崇德元年封貝子從伐朝鮮偕貝勒多鐸圍南漢山城朝鮮將以八千人赴援盡殲之又以五千人赴援擊之敗走二年與議政四年從英親王阿濟格圍塔山連山五年從睿親王多爾袞屯田義州錦州兵夜襲我鎮藍旗營與屯齊共擊敗之六年坐圍錦州不臨城且私遣兵還議削爵詔爵銀千上征松

山大破明總督洪承疇兵洛託橫擊潰兵於塔山復圍錦州七年從鄭親王濟爾哈朗攻塔山克之授督察院承政偕博洛尼堪駐錦州八年坐事削爵幽禁順治初釋之八年復封三等鎮國將軍十三年授鎮藍旗滿洲固山額真十四年孫可望李定國馮雙禮等擾湖南命爲寧南靖寇將軍駐防荊州佐經略洪承疇討之遣兵取心潭隘斷巴東渡口可望將趙世超譚新傳趙三才皆降俄可望與定國內訌戰不勝亦來降上命偕都統濟席哈自湖南進取貴州十五年與承疇會師常德次辰州復沅陵瀘溪麻陽黔陽淑浦諸縣進次沅州檄偏沅巡撫袁廓宇徇靖州屯鎮遠二十里山口以禦敵雙禮部將馮天裕閻廷桂等先後自平越降四月師至貴州明將羅大順收潰卒襲新添衛擊敗之洛託與承疇守貴陽十六年師還叙功加授拖沙喇哈番進一等鎮國將軍十七年命爲安南將軍征鄭成功大破之十一月還康熙四年卒子富達禮襲拜他喇布勒哈番世職旋改變奉恩將軍八年進一等輔國將軍坐詔索額圖爲其從弟所許削爵

通達郡王雅爾哈齊顯祖第四子太祖同母弟其生平不著順治十年五月追封諡配享太廟

篤義剛果貝勒巴雅喇顯祖第五子初授台吉歲戊戌正月太祖命偕褚英伐安楚拉庫路夜取屯寨二十降萬餘人賜號卓禮克圖譯言篤義歲丁未五月伐東海窩集部取赫席赫鄂謨和蘇魯佛訥赫托克索三路俘二千人天命九年卒順治十年追封諡子拜音圖事太宗授三等昂邦章京鑲黃旗固山額真崇德元年五月從武英郡王阿濟格略保定攻安肅克之十月獻所獲於篤恭殿上以拜音圖戰不忘君深嘉之從伐朝鮮騎入城收其輜重三年從睿親王多爾袞伐明偕固山額真圖爾格敗敵董家口毀邊牆入克青山關下城六年拜音圖弟鞏阿岱從大軍圍錦州臨陣退撓下王大臣鞠其罪拜音圖拂袖出坐徇庇論死命奪爵職爵緩贖罪尋率師助多爾袞攻錦州復偕多鐸圍松山七年復授固山額真順治二年從多鐸西征收敵潼關封一等鎮國將軍賜緡服一襲復從南征克揚州又以舟師破其兵於江南岸偕貝子博洛下杭州敘

功賜金八十銀四千鞍馬一三年授三等公五年進貝子從阿濟格戍大同叛將姜瓖既死餘黨猶分據郡邑六年拔沁州復圍瓖將胡國鼎於潞安殲其衆進貝勒鞏阿岱事多爾袞最見信任累進封貝子多爾袞既薨坐黨附罪死拜晉圖亦牽連削爵幽禁削宗籍嘉慶四年仁宗命復宗籍賜紅帶鞏阿岱裔孫伊里布自有傳

諸王二

太祖諸子一

廣略貝勒褚英

貝子 勅安 杜平貝勒 杜度 子 禮 敬 附 結 王 尼堪 子 杜 額 結 子 鄭 懷 厚

廢 貝子 尚 所

禮烈親王代善

子 英 濟 哈 爾 王 額 禮 達 海 郎 克 勤 郡 王 克 勤 郡 王 岳 輔 託 公 額 託 占 額 滿 敏

喀 爾 喀 從 子 康 額 爾 濟 親 王 軍 品 廣 毅 巴 岳 思 託 子 舒 爾 格 介 郎 曾 王 額 平 格 敏 郎 王 額 敏 貝 勒

額 爾 濟 親 子 阿 爾 達 子 勒 爾 承 德 惠 孫 額 王 勒 克

太祖十六子孝慈高皇后生太宗元妃佟佳氏生廣略貝勒褚英禮親王代善

繼妃富察氏生莽古爾泰德格類大妃烏拉納喇氏生阿濟格睿親王多爾袞

豫親王多鐸側妃伊爾根覺羅氏生饒餘郡王阿巴泰庶妃兆佳氏生鎮國公

阿拜庶妃鈕祜祿氏生鎮國將軍湯古代輔國公塔拜庶妃嘉穆瑚覺羅氏生

鎮國公巴布泰鎮國將軍巴布海庶妃西林覺羅氏生輔國公賴慕布而費揚

古不詳所自出

廣略貝勒褚英太祖第一子歲戊戌太祖命伐安楚拉庫路取屯寨二十以歸賜號洪巴圖魯封貝勒歲丁未偕貝勒舒爾哈齊代善徒瓦爾喀部斐悠城新附之衆軍夜行陰晦雖有光舒爾哈齊疑不吉欲班師褚英與代善持不可抵斐悠城收其屯寨五百戶令扈爾漢衛以先行烏喇貝勒布占泰以萬人邀之路扈爾漢所部止二百人褚英代善策馬諭之曰上每征伐皆以寡擊衆今日何懼且布占泰降虜耳乃不能復縛之耶衆皆奮因分軍夾擊敵大敗得其將常柱瑚里布斬三千級獲馬五千甲三千師還上嘉其勇錫號曰阿爾哈圖土門譯言廣略歲戊申三月偕貝勒阿敏伐烏喇克宜罕山城布占泰與蒙古科爾沁貝勒翁阿岱合兵出烏喇二十里望見我軍知不可敵乃請盟褚英屢有功上委以政不恤衆諸弟及羣臣怨於上上寢疏之褚英意不自得焚表告天自訴乃坐咀呪幽禁是歲癸丑越二年乙卯閏八月死於禁所年三十六明人以爲諫上母背明忤旨被譴褚英死之明年太祖稱尊號褚英子三有爵者二

杜度尼堪安平貝勒杜度褚英第一子初授台吉天命九年喀爾喀巴約特部
台吉恩格德爾請內附杜度從貝勒代善迎以歸封貝勒天聰元年從貝勒阿
敏岳託等伐朝鮮朝鮮國王李倬請和諸貝勒許之阿敏欲仍攻王京岳託持
不可阿敏引杜度欲與留屯杜度亦不可卒定盟而還三年十一月從上伐明
薄明都敗明援兵又偕貝勒阿巴泰等略通州焚其舟至張家灣十二月師還
至薊州明兵五千自山海關來援與代善親陷陣傷足猶力戰殲其衆駐遵化
四年正月明兵來攻敗之斬其副將獲駝馬以千計七年明將孔有德耿仲明
降偕貝勒濟爾哈朗阿濟格赴鎮江迎以歸詔問伐明及朝鮮察哈爾三者何
先杜度言朝鮮在掌握可緩察哈爾逼則征之若尙遠宜取大同邊地秣馬乘
機深入八年軍海州崇德元年進封安平貝勒海州河口守將伊勒慎報明將
造巨艦百餘截遼河命杜度濟師明兵却乃還是冬上伐朝鮮杜度護輜重後
行略皮島雲從島大花島緞山二年二月次臨津江前一日冰解夕大雨雪冰
復合師畢渡上聞之曰天意也從睿親王多爾袞取江華島敗其水師遂克之

三年多爾袞將左翼岳託將右翼伐明杜度爲岳託副師進越密雲東牆子嶺
明兵迎戰擊敗之進攻牆子嶺堡分軍破黑峪古北口黃崖口馬蘭峪岳託薨
於軍杜度總軍事會多爾袞軍於通州河西越明都至涿州西抵山西南抵濟
南克城二十降其二凡十六戰皆捷殺總督以下官百餘俘二十餘萬還出青
山口自太平寨奪隘行四年四月師還賜駝一馬二銀五千命掌禮部事略錦
州寧遠五年代濟爾哈朗於義州屯田刈錦州禾遇明兵敗之克錦州臺九小
凌河西臺二明總督洪承疇以兵四萬營杏山城外偕豪格擊敗之追薄壕而
還又殲連糧兵三百往錦州誘明兵出戰復擊敗之獲大凌河海口船追斬敵
之犯義州者冬再圍錦州六年攻廣寧敗松山錦州援兵以從多爾袞離城遠
駐遣軍私還論削爵詔罰銀二千復圍錦州敗明兵於松山是秋復從上伐明
留攻錦州七年六月薨病革時諸王貝勒方集篤恭殿議出征功罪上聞之爲
罷朝喪還遣大臣迎奠雍正二年立碑旌其功杜度子七有爵者五杜爾祜穆
爾祜特爾祜杜努文薩弼愍厚貝勒杜爾祜杜度第一子初封輔國公從太宗

圍松山錦州有功坐事降襲鎮國公復以甲喇領員拜山等首告怨望削爵黜宗室順治元年從多鐸南征二年復宗室封輔國公叙功賜金五十銀二千五年從濟爾哈朗徇湖廣六年敗敵永興次辰州進勦廣西定全州七年賜銀六百八年進貝勒十二年二月卒子設子敦達襲貝子設恪恭子孫遞降以輔國公世襲敦達八世孫光裕襲輔國公光緒二十六年德意志等國兵入京師死雖贈貝子銜設勳愍貝子穆爾祜杜度第二子天聰九年師伐明穆爾祜從貝勒多鐸率偏師入寧遠錦州綴明師抵大凌河擊斬明將劉應選追奔至松山獲馬二百克盞一並有功崇德元年封輔國公七年十月與杜爾祜同得罪順治元年從多鐸南征破李自成潼關先後拔兩營賊犯我噶布什賢兵穆爾祜擊敗之又設伏山隘賊自山上來襲敗其衆二年復宗室封三等鎮國將軍三年進一等從多鐸征蘇尼特布騰機思等敗之四年進輔國公六年從尼堪擊叛將姜瓖進貝子復從尼堪征湖南賜蟒衣鞍馬弓矢至衡州尼堪戰歿十一年論前罪削爵卒子長源授鎮國將軍品級子孫遞降至雲騎尉品級爵除恪

僖貝子特爾帖杜度第三子崇德四年封輔國公六年從圍錦州敗明兵於松山杏山間七年移師駐塔山克之與杜爾帖同得罪順治元年從多爾袞入山海關破李自成逐之至慶都復從多鐸敗自成流關二年復宗室封輔國公賜金五十銀二千六年進貝子十五年卒子諡子孫遞降以奉恩將軍世襲懷愍貝子薩弼杜度第七子杜爾帖得罪從坐黜宗室順治元年從多爾袞入山海關破李自成有功二年復宗室封輔國公三年從勒克得渾南征略荊州屢破敵師還賜金五十銀千六年從擊叛將姜瓖戰朔州敗瓖將姜之芬孫乾高奎等移師攻寧武瓖將劉偉等降進貝子十二年卒子諡子固鼎襲鎮國公諡悼愍子孫遞降以鎮國將軍世襲杜度諸子惟第六子杜努文無戰功順治初封輔國公卒康熙三十七年追封貝子亦諡懷愍子蘇努初襲鎮國公事聖祖累進貝勒雍正二年坐與廉親王允禩爲黨削爵黜宗室敬謹莊親王尼堪褚英第三子天命間從伐多羅特董夔諸部有功天聰九年師伐明從多鐸率偏師入錦寧界綴明師崇德元年封貝子上伐朝鮮從多鐸逐朝鮮國王李倬至南

漢山城殲其援兵四年上伐明從阿濟格等攻塔山連山七年戊錦州順治元年四月從多爾袞入山海關敗李自成復從阿濟格追擊至慶都進貝勒復從多鐸率師自孟津至陝州破敵二年師次潼關自成將劉方亮出禦尼堪與巴雅喇繼章京圖賴夾擊之獲馬三百餘又偕貝子尙善收敵騎趨歸德定河南詔慰勞賜弓一五月從多鐸克明南都追獲明福王由崧又攻江陰力戰克之師還賜金二百銀萬五千鞍一馬五三年從豪格西征時賀珍擾漢中二隻虎孫守法擾興安羣寇蠭起尼堪次西安自棧道進軍珍自雞頭關迎拒擊殲之疾馳漢中躡其壘賊走西鄉追擊於楚湖至漢陰二隻虎奔四川孫守法奔岳科寨十一月復從豪格入四川斬張獻忠於西充與貝子滿達海分兵定遵義夔州茂州隆昌富順內江資陽四川平五年師還偕阿濟格平天津土寇進封敬謹郡王六年命爲定西大將軍討叛將姜瓖屢敗敵破瓖所置巡撫姜輝其將羅英壇以所部降多爾袞赴大同招撫姜瓖承制進尼堪親王旋自左衛圍大同瓖將楊振威等斬瓖以降師還七年與巽親王滿達海端重親王博洛理

六部事多爾袞遣尙書阿哈尼堪迎朝鮮王弟阿哈尼堪啟尼堪以章京恩國泰代行事覺尼堪坐徇隱降郡王八年復封親王又坐不奏阿濟格私蓄兵器降郡王尋掌禮部居數月再復親王掌宗人府事孫可望等犯湖南命爲定遠大將軍率師討之瀕行賜御服佩刀鞍馬上親送於南苑李定國陷桂林詔入廣西勦賊十一月師次湘潭明將馬進忠等遁師響衡州噶布什賢兵擊敵衡山縣敗敵兵千八百尼堪督兵夜進兼程至衡州詰旦師未陣敵四萬餘猝至尼堪督隊進擊大破之逐北二十餘里獲象四馬八百有奇敵設伏林內中途伏發師欲退尼堪曰我軍擊賊無退者我爲宗室退何面目歸乎奮勇直入敵圍之數重軍失道尼堪督諸將縱橫衝擊陷淖中矢盡拔刀戰力竭歿於陣十年喪歸轅朝三日命親王以下郊迎予諡是役也從征諸將皆以陷師論罪第二子尼思哈襲順治十六年追諡尼堪取多爾袞身後遺財及不効尙書譚泰驕縱罪以陳亡留爵十七年卒諡曰悼第一子蘭布襲貝勒聖祖念尼堪以親王陳亡進蘭布郡王仍原號七年進親王蘭布取熬拜女八年熬拜旣得罪蘭

布坐降鎖國公十三年從尙善討吳三桂於湖南十七年卒於軍十九年追論
退縮罪削爵子賴士襲輔國公乾隆四十三年高宗以尼堪功著力戰捐軀進
鎖國公世襲

禮烈親王代善太祖第二子初號貝勒歲丁未與舒爾哈齊褚英徙東海瓦爾
喀部娶悠城新附之衆烏拉貝勒布占泰遣其將博克多將萬人要於路代善
見烏喇兵營山上分兵緣山奮擊烏喇兵敗竄代善馳逐博克多自馬上左手
攬其背斬之方雪甚寒督戰益力烏喇敗兵僵臥相屬復得其將常柱瑚哩布
師還太祖嘉代善勇敢克敵賜號古英巴圖魯歲癸丑太祖伐烏喇克遜扎搭
郭多郭謨三城布占泰將三萬人越富勒哈城而營諸將欲戰太祖猶持重代
善曰我師遠伐利速戰慮布占泰不出耳出而不戰將謂之何太祖曰我豈怯
戰恐爾等有一二被傷欲計萬全今衆志在戰復何猶豫因麾兵進與烏喇步
兵相距百步許代善從太祖臨陳奮擊大破之克其城烏喇兵潰走代善追殪
過半布占泰奔葉赫所屬城邑盡降編戶萬家天命元年封和碩貝勒以序稱

大貝勒太祖始用兵於明行二日遇兩太祖欲還代善曰我師旣入明境遽引還將復與修好乎師旣出孰能諱之且兩何害適足以懈敵耳太祖從之夜半兩驍味爽圍撫順明將李永芳以城降東州瑪哈丹二城及臺堡五百餘俱下師還出邊二十里明將張承廕率兵來迫代善偕太宗還戰復入邊破其三營斬承廕及其裨將頗廷相等四年命代善率諸將十六兵五千守扎喀關備明尋引還三月明經略楊鎬大舉來侵遣總兵劉綎將四萬人出寬甸杜松將六萬人出撫順李如柏將六萬人出清河馬林將四萬人出三岔口太祖初聞明兵分出寬甸撫順以寬甸有備親率師西禦撫順明兵代善將前軍謀復告明兵出清河代善曰清河道狹且崎嶇不利速行我當禦其自撫順來者過扎喀關太宗以祀事後至言界凡方築城民應役宜急衛之代善引兵自太蘭岡趨界凡與築城役屯吉林崖杜松以二萬人來攻別軍陳薩爾濟山代善與貝勒阿敏莽古爾泰及諸將議以千人助吉林崖軍使陟山下擊餘軍張兩翼右應吉林崖左當薩爾濟太祖至以右翼兵益左翼先趨薩爾濟明兵出我兵仰射

不移時破其壘吉林崖軍自山馳而下右翼渡河夾擊破明兵斬松等馬林出
三岔口以三萬人軍於尙間崖監軍道潘宗顏將萬人軍於飛芬山松後部襲
念遂李希泌軍於幹琿鄂謨太祖督兵攻之代善將三百騎馳尙間崖見明兵
結方營掘壕三匝以火器居前騎兵繼之嚴陣而待遣騎告太祖太祖已擊破
念遂等親至尙間崖令於軍皆下馬步戰未畢下明兵突至代善躍馬入陣師
奮進斬獲過半翼日代善以二十騎先還調南路敵遠近太祖亦還聞劉綎兵
深入命代善率先至諸軍禦之出瓦爾喀什紐已至阿布達哩岡太宗率右翼
陟山代善率左翼出其西夾擊明兵大潰斬綎鎬所遣諸軍盡敗七月從太祖
克鐵嶺八月太祖伐葉赫葉赫有二城全台石居其東布揚古居其西師至太
祖攻東城代善攻西城東城下布揚古及其弟布爾杭古乞盟代善諭而降之
六年三月從太祖伐明瀋陽率其子岳託戰斬敵甚衆復偕莽古爾泰還金州
民於復州十一年八月太祖崩岳託與其弟薩哈璘告代善請奉太宗嗣位代
善曰是吾心也告諸貝勒定策太宗辭讓再三代善等請益堅乃即位是冬伐

蒙古喀爾喀扎魯特布倫貝勒巴克等斬鄂爾齊圖俘所屬而歸天聰元年從太宗圍錦州拒明山海關援兵薄寧遠破敵以暑還師三年從伐明入洪山口克遵化薄明都明總兵滿桂等赴援擊敗之德勝門外克良鄉又破明兵永定門外從上閱薊州形勢明步兵五千自山海關至與師遇不及陳列車楯槍礮而營代善率左翼四旗擊破之四年正月明侍郎劉之綸率兵至遵化營山上代善環山圍之破其七營之綸走入山射殺之五年八月從上圍大凌河收城外臺堡九月明總兵吳襄監軍道張春等將四萬人自錦州至距大凌河十五里代善從上將二萬人擊之明兵方陳發鎗礮督騎兵突入矢如雨明兵大却襄遁春收潰兵復陳黑雲起風自西來明兵乘風縱火逼我軍大雨反風燬其營明兵死者甚衆師乘之獲春等春見上不屈上將誅之代善諫乃赦之初太祖命四和碩貝勒分直理政事每御殿和碩貝勒皆列坐至是禮部參政李伯龍請定朝會班制時和碩貝勒阿敏已得罪莽古爾泰亦以罪降多羅貝勒諸貝勒議不得列坐代善曰奚獨莽古爾泰上居大位我亦不當並列自今請上

南面我與莽古爾泰侍坐于側諸貝勒坐于下六年四月從上伐察哈爾過興安嶺聞林丹汗遠遁移師攻歸化城越大同宣府出塞與沙河堡得勝堡張家口諸守將議和而還八年五月從伐明出榆林口至宣府邊外分兵自喀喇鄂博克得勝堡遂自朔州趨馬邑會師大同而還崇德元年封和碩兄禮親王冬從上伐朝鮮二年有司論王克朝鮮違旨以所獲糧米飼馬及選用護衛溢額上曰朕于兄禮親王敬愛有加何不體朕意若是又曰王等事朕雖致恭敬朕何所喜必正身行義以相輔佐朕始嘉賴焉四年十一月從上獵于葉赫射獐馬仆傷足上下馬爲裹創酌金卮勞之因泣下曰朕以兄年高不可馳馬兄奈何不自愛罷獵還命乘輿緩行日十餘里護以歸八年太宗崩世祖即位王集諸王貝勒大臣議以鄭親王濟爾哈朗睿親王多爾袞輔政又發貝子碩託郡王阿達禮私議立睿親王下法司誅之碩託王次子阿達禮薩哈璘子王孫也順治元年正月朔命上殿母拜著爲例二年春至京師五年十月薨年六十六賜祭葬立碑紀功康熙十年追諡乾隆四十三年配饗太廟代善子八有爵者

七岳託碩託薩哈璘瓦克達瑪占滿達海祜塞祜塞初封鎮國公追封惠順親王而滿達海襲爵巽簡親王滿達海代善第七子崇德五年從圍錦州六年封輔國公從肅親王豪格圍松山破敵洪承疇赴援戰所乘馬創豪格呼曰馬創矣亟易馬明兵大至力戰殿而還明總兵吳三桂倚山爲營滿達海合諸軍擊破之三桂宵遁七年從濟爾哈朗克塔山八年授都察院承政順治元年從入關敗李自成進貝子復從英親王阿濟格逐自成趙綏德二年克沿邊三城及延安自成遁湖廣師還三年從豪格討張獻忠自漢中進秦州降獻忠將高如礪師次西充擊斬獻忠與尼堪分勦餘賊五年師還坐徇巴牙喇靈章京希爾根冒功議罰銀睿親王多爾袞令免之六年襲爵降將姜瓖叛大同滿達海與郡王瓦克達率師討之尋授征西大將軍克朔州馬邑寧武關寧化所八角堡靜樂縣遂與博洛會師復汾州瓖誅大同平遣兵圍平遙太谷遼沁先後克之屯留襄垣榆社武鄉諸縣俱下睿親王多爾袞令留瓦克達勦餘寇滿達海還京師八年世祖親政改封號曰巽親王諸王分治部務滿達海掌吏部九年二

月薨予諡十六年追論滿達海於奏削多爾袞封爵後奪其財物掌吏部懼譴泰聯縱未論劾創設仆碑降爵爲貝勒子常阿岱初襲親王降貝勒康熙四年薨設懷愍子星尼襲貝子再襲輔國公星尼子星海襲鎮國公並坐事奪爵乾隆四十三年追錄滿達海功命星海孫福色鏗額以輔國將軍世襲常阿岱既降爵以從弟傑書襲親王康良親王傑書祜塞第三子初襲封郡王八年加號曰康十六年襲爵遂改號康親王康熙十三年六月命爲奉命大將軍率師討耿精忠師至金華溫州處州已陷精忠將徐尙朝以五萬人犯金華王令都統巴雅爾副都統瑪哈達迎擊破之尙朝復來犯巴雅爾會總兵陳世凱破賊壘積道山殲二萬餘復永康縉雲精忠將沙有祥踞桃花嶺梗處州道瑪哈達率軍擊之有祥潰走十四年復處州及仙居尙朝等猶踞宣平松陽屢窺處州都統拉哈達偕諸將禦之破賊於石塘於石佛嶺於大王嶺東隴隘口上套寨下五塘諸地詔寧海將軍傅喇塔自黃巖規溫州趣傑書白衢州入傑書疏言處州有警兵單不能驟進上諭曰王守金華將及二載徒以文移往來不親統兵

規勦賊何自滅宜刻期進取十五年自金華移師衢州精忠將馬九玉屯大溪灘拒師傑書督諸將力擊之伏起刃相接傑書坐古廟側指揮礮爲火器所穿衛兵負扉爲蔽傑書談笑自若諸軍皆踴躍奮擊精忠兵大敗溪水爲赤傑書令偃旗鼓一日夜行數百里乘月攻克江山進徇常山次仙霞關精忠將金應虎收舟泊隔岸師不得渡令循灘西上視水淺亂流涉精忠兵不戰潰應虎降進拔浦城檄精忠諭降師復進拔建陽撫定建寧延平二府精忠遣其子顯祚迎師傑書承制許以不死精忠出降十月師入福州精忠請從師討鄭錦自贖入告詔許之錦將許耀以三萬人屯烏龍江南小門山眞鳳山傑書遣拉哈達等擊走之疏言精忠從師出勦其弟昭忠衆忠宜留一人於福州轄其屬又言福建制兵已設如額精忠所率兵不少左右兩鎮兵可並裁去溫州總兵祖宏勳藩下總兵曾養性宜別除授上命昭忠爲鎮平將軍駐福州餘並如所請傑書遣兵敗錦將吳淑於浦塘復邵武師復進泰寧汀州及所屬諸縣皆下十六年拉哈達敗錦軍于白茅山太平山破二十六壘克興化復泉州漳州奏入詔

褒傑書功傑書令拉哈達等率兵與精忠進次潮州規廣東錦兵陷平和逼海澄副都統穆赫林等守禦越七旬援不至與長泰並陷傑書請罪詔俟師還議之錦兵復破同安惠安傑書遣軍討復之並復長泰破敵於柯鏗山萬松關又遣別將破敵江東橋石衛寨十八年戰郭塘歐溪頭屢破敵敵犯江東橋擊却之副都統吉勒塔布敗敵熬頭山沃申克東石城十九年沃申撫定大定小定玉洲石馬諸地克海澄水師提督萬正色克海壇拉哈達等克廈門金門都統賚塔克銅山錦以殘兵還臺灣精忠既降復有異志傑書疏請逮治上令傑書諷精忠請入覲亦召傑書師還留八旗兵三千分守福州泉州漳州十月至京師上率王大臣至蘆溝橋迎勞之二十一年追諭金華頓兵及遲援海澄罪奪軍功罰俸一年二十九年率兵出張家口屯歸化城備噶爾丹三十六年閏三月薨予諡子椿泰襲椿泰齡達大度遇下以寬善舞六合槍手法矯捷敵十數人四十八年薨諡曰悼子崇安襲雅正間官都統掌宗人府九年率兵駐歸化備噶爾丹尋命護撫遠大將軍印召還十一年薨諡曰修傑書子巴爾圖襲乾

隆十八年薨年八十諡曰簡崇安子永安襲四十二年復號禮親王永恩性寬
易而持己嚴襲爵垂五十年淡泊勤儉出處有恒嘉慶十年薨諡曰恭子昭槤
襲昭槤好學自號汲修主人尤習國故二十一年坐陵辱大臣濫用非刑奪爵
圈禁二十二年命釋之從弟麟趾襲父永憲永恩弟也亦嗜文學能詩追封禮
親王麟趾道光元年薨諡曰安孫全齡襲父錫春追封禮親王全齡三十年薨
諡曰慎子世鐸襲同治間授內大臣右宗正光緒十年恭親王奕訢罷政太后
諮醇親王奕譞諸王孰可任舉世鐸對乃命在軍機大臣上行走並詔緊要事
件會同奕譞商辦德宗親政世鐸請解軍機大臣奉太后旨不許十九年命增
護衛二十年太后萬壽賜親王雙俸再增護衛二十六年上奉太后西巡世鐸
不及從召赴行在復以病未至二十七年七月罷直授御前大臣遜位後三年
薨諡曰恪子誠厚襲薨諡曰敦克勤郡王岳託代善第一子初授台吉天命六
年師略奉集堡將還謀告明軍所在岳託偕台吉德格類擊敗之上克瀋陽明
總兵李秉誠引退師從之至白塔鋪岳託後至逐北四十里殲明兵三千餘喀

爾喀扎魯特貝勒昂安執我使送葉赫被殺八年岳託同台吉阿巴泰討之斬昂安及其子十一年復從代善伐扎魯特斬其部長鄂爾齊圖俘其衆封貝勒天聰元年偕貝勒阿敏濟爾哈朗伐朝鮮克義州定州漢山三城渡嘉山江克安州次平壤其守將棄城走再進次中和諭朝鮮國王李倬降阿敏欲直攻王京岳託密與濟爾哈朗議駐平山再使諭倬倬願歲貢方物岳託謀曰吾曹事已集蒙古與明皆吾敵設有警可不爲備乎宜與盟而歸旣盟告阿敏阿敏以未與盟縱兵掠岳託曰盟成而掠非義也勸之不可復令倬弟覺與盟乃還師從上伐明又從圍寧遠並有功復收明兵于牛莊二年略明邊陲錦州杏山高橋三城自十三站以東毀墩二十一殺守者三十人師還上迎勞賜良馬一三年略明錦州寧遠焚其積聚上伐明岳託與濟爾哈朗率右翼兵夜攻大安口毀水門入敗馬蘭營援兵於城下及旦見明兵營山上分兵授濟爾哈朗擊之岳託駐山下以待復見明兵自遵化來援顧濟爾哈朗曰我當擊此五戰皆捷尋次順義擊破明總兵滿桂等薄明都復從代善擊收援兵偕貝勒薩哈麟圍

永平克香河四年還守瀋陽五年三月詔詢諸貝勒國人怨斷獄不公何以弭之岳託奏刑罰舛謬實在臣等請上擢直臣近忠良絕讒佞行黜陟之典使諸臣知激勸是歲初設六部命掌兵部事上攻大凌河趨廣寧岳託偕貝勒阿濟格率兵二萬別自義州進與師會固山額真葉臣圍城西南岳託爲之應祖大壽請降以子可法質可法見諸貝勒將拜岳託曰戰則仇敵和則弟兄何拜爲因問何爲死守空城曰畏屠戮耳岳託善諭之遣歸越三日大壽乃降上議取錦州命偕諸貝勒統兵四千易漢服偕大壽作潰奔狀夜襲錦州會大霧乃止六年正月岳託奏前克遼東廣寧漢人拒命者誅之後復屠灤州永平是以人懷疑懼今天與我大凌河正欲使天下知我善撫民也臣愚以爲善撫此衆歸順者必多當先予以室家出公帑以贍之倘蒙天眷奄有其地仍還其家產彼必悅服又各官宜令諸貝勒給莊一區每牛衆令取漢男婦二人牛一頭編爲屯人給二屯出牛口之家各牛衆復以官值償之至明諸將士棄其鄉土窮年戍守畏我誅戮今慕義歸降善爲撫卹毋令失所則人心附大業成矣疏入上

嘉納之尋偕濟爾哈朗等略察哈爾部至歸化城俘獲以千計又偕貝勒德格類行略地自耀州至蓋州南七年又偕德格類等攻旅順口留兵駐守師還上郊勞以金卮酌酒賜之八年上閱兵瀋陽岳託率滿洲蒙古十一旗兵列陳二十里許軍容整肅上嘉之從上征察哈爾有疾先還九年略明山西岳託復以病留歸化城土默特部來告博碩克圖汗子俄木布遣人偕阿魯喀爾喀及明使者至將謀我岳託伏兵邀之擒明使者令土默特捕斬阿魯喀爾喀匿馬駝者部分土默特壯丁立隊伍授條約尋與諸貝勒會師偕還崇德元年四月封成親王八月坐徇庇莽古爾泰碩託及離間濟爾哈朗豪格論死上寬之降貝勒罷兵部未幾復命攝部事二年八月上命兩翼較射岳託言不能執弓上勉之再三始引弓弓墮地者五乃擲去諸王論岳託驕慢當死上再寬之降貝子罰銀五千三年復貝勒從上征喀爾喀至博碩堆知扎薩克圖汗已出走乃還八月伐明授岳託揚武大將軍貝勒杜度副之統右翼軍統左翼者睿親王多爾袞也至牆子嶺明兵入堡外爲三寨我師克之堡堅不易拔用俘卒言嶺東

西有間道分兵攻其前綴明師潛從間道踰嶺入克臺十有一師深入徇山東下濟南岳託薨于軍四年多爾袞奏捷無岳託名上驚問始聞喪大慟輟膳命毋使禮親王知喪還上至沙嶺遙奠還宮輟朝三日詔封爲克勤郡王賜駝五馬二銀萬康熙二十七年立碑紀功乾隆四十三年配享太廟岳託子七有爵者五羅洛渾喀爾楚渾巴爾楚渾巴思哈祜里布巴爾楚渾祜里布並恩封貝勒巴爾楚渾諡和惠祜里布諡剛毅衍禧介郡王羅洛渾岳託第一子初襲貝勒崇德五年迎蒙古多羅特部蘇班岱阿爾巴岱于杏山遇明兵搏戰破之賜御廐良馬一尋圖錦州復從伐明克松山賜蟒緞八年坐嗜酒妄議敏惠恭和元妃喪不輟絲竹削爵旋復封命濟爾哈朗多爾袞戒諭之順治元年從定京師進衍禧郡王三年偕肅親王豪格征四川薨于軍康熙間追諡子羅科鐸襲八年改封號曰平郡王十五年從信郡王多尼徇雲南屢破明將李定國白文選十六年賜蟒衣弓刀鞍馬旌其勞康熙二十一年薨諡曰比子訥爾圖襲二十六年以毆斃無罪人及折人手足削爵弟訥爾福襲四十年薨諡曰悼子訥

爾蘇襲五十七年從撫遠大將軍允禔收西藏駐博羅和碩尋移古木六十年
攝大將軍事雍正元年還京四年坐貪婪削爵子福彭襲平敏郡王福彭既襲
爵授右宗正署都統十一年命軍機處行走授定邊大將軍率師討噶爾丹策
零師次烏里雅蘇臺奏言行軍駝馬爲先今喀爾喀扎薩克貝勒等遠獻駝馬
力請停償直彼不私其所有而宗室王公貝勒皆有馬豈不內媿於心臣有馬
五百願送軍前備用十二年率將軍傅爾丹赴科布多護北路諸軍尋召還十
三年復命率師駐鄂爾坤築城額爾德尼昭之北尋以慶復代召還乾隆初歷
正白正黃二旗滿洲都統十三年薨子諡子慶寧襲十五年薨諡曰僖無子以
訥爾蘇孫慶恒襲授右宗正坐旗員冒借官銀降貝子四十年復王爵四十三
年復號克勤郡王四十四年薨諡曰良以訥爾圖孫雅朗阿襲五十九年薨諡
曰莊子恒謹襲嘉慶四年以不避皇后乘輿奪爵以弟恒元子尙格襲恆元追
封克勤郡王尙格道光四年以病乞休十三年薨諡曰簡子承碩襲十九年薨
諡曰恪子慶惠襲咸豐八年授正黃旗漢軍都統十年上幸熱河命留京辦事

英國兵燬圓明園其將巴夏禮先爲我師所擒慶惠釋之疏請恭親王奕訢入城議撫十一年薨諡曰敬子晉祺襲歷左宗人右宗正都統領侍衛內大臣德宗大婚加親王銜孝欽皇后萬壽賜四國龍補服並歲加銀二千二十六年薨諡曰誠子崧杰襲宣統二年薨諡曰順子晏森襲顯榮貝勒喀爾楚渾岳託第三子順治元年從多爾袞擊李自成於山海關二年封鎮國公三年從豪格討張獻忠偕貝子滿達海率師進勦獻忠將高如礪等率衆降豪格殲獻忠喀爾楚渾在事有功五年授都統六年從尼堪討叛將姜瓖圍寧武破敵進貝勒八年攝理藩院事卒予諡顯榮子克齊方一歲襲爵歷七十一年卒年七十二子魯賓初封貝子事聖祖授左宗正從征噶爾丹罷宗正雍正元年襲爵四年坐狂悖削爵復封輔國公乾隆八年卒年七十四諡恪思子孫以奉恩將軍世襲鎮國將軍品級巴思哈岳託第五子崇德四年封鎮國將軍順治六年進貝勒九年從尼堪征湖南賜蟒衣鞍馬弓矢尼堪戰死衡州屯齊代爲定遠大將軍巴思哈與合軍自永州趨寶慶敗敵周家坡十一年追論尼堪敗績失援罪削

爵十二年授都統尋授鎮國公品級十五年從多尼下雲南師次貴州破敵十六年薄雲南會城同貝勒尙善克鎮南州玉龍關永昌府騰越州賜蟒袍鞍馬十七年師還追議在永昌縱兵擾民降鎮國將軍品級十八年卒碩託代善第二子初授台吉天命六年從伐明攻奉集堡十年偕貝勒莽古爾泰援科爾沁十一年從代善伐喀爾喀巴林部又伐札哈特部皆有功授貝勒天聰元年從貝勒阿敏等伐朝鮮又從上伐大凌河圍錦州四年師克永平偕阿敏駐守阿敏引還碩託坐削爵五年從攻錦州明兵攻阿濟格營碩託力戰傷於股上親酌金危勞之明兵趨大凌河碩託擊敗張春復傷於手敘勞賜綵緞十布百八年從代善白喀喇鄂博攻得勝堡克之又擊敗朔州騎兵偕薩哈璘略代州拔崞縣分克原平驛尋封貝子崇德元年從伐朝鮮圍南漢山城敗援兵二萬餘二年偕阿濟格攻克皮島三年偕濟爾哈朗攻寧遠四年坐僭上越分降輔國公偕阿濟格伐明俘獲無算論功賜駝馬各一五年六月從多爾袞圍錦州坐離城久駐又遣卒私歸議削爵上讓之曰爾罪多矣朕屢宥爾屢犯若不關己

者後當任法司治之不汝宥也改爵銀千尋復封貝子太宗崩碩託與阿達禮謀立睿親王多爾袞譴死黜宗室顯毅親王薩哈璘代善第三子初授台吉天命十年察哈爾林丹汗攻科爾沁薩哈璘將精騎五千赴援解其圍十一年從代善伐喀爾喀巴林部又伐札哈特部皆有功授貝勒天聰元年上伐明率巴雅喇精騎爲前隊上自大凌河至錦州明兵走薩哈璘邀擊殲之復率偏師衝塔山糧運敗明兵二萬人攻寧遠擊明總兵滿桂薩哈璘力戰被創三年上伐明次波羅河屯代善等密請班師上不憚薩哈璘與岳託力贊進取由是克還化辦明都十二月薩哈璘略通州焚其舟次張家灣復國永平克香河四年永平既下薩哈璘與濟爾哈朗駐守永平人李春旺譏言將屠城斬以徇旋諭降遷安瀋州建昌臺頭營鞍山堡諸地明兵自樂亭撫甯攻瀋州薩哈璘率軍赴援明兵引退貝勒阿敏來代乃還師五年詔諸貝勒指陳時政薩哈璘言圖治在人人主灼知邪正則臣下爭尙名節惟皇上慎簡庶僚任以政事遇大征伐上親在行間諸臣皆秉方略若遣軍宜選賢能者爲帥給符節畀事權仍限某

官以下千軍令許軍法從事初設六部掌禮部事六年略歸化城俘蒙古千餘
指授蒙古諸貝勒牧地申約法七年六月詔問征明及察哈爾朝鮮三者何先
薩哈璘言當寬朝鮮拒察哈爾而專征明察哈爾雖不加兵如蟲食穴中勢且
自盡至于明我少緩則彼守益固臣意視今歲秋成圖進取乘彼禾稼方熟因
糧于敵爲再進計量留兵防察哈爾先以騎兵往來襲擊蹂躪再簡精兵自一
片石入山海關則寧錦爲無用或仍自寧錦入斷北京四路度地形據糧足之
地乘機伺便二三年中大勦集矣尋略山海關八年偕多爾袞迎降將尙可喜
招撫廣鹿長山二島戶口三千八百有奇從伐明薩哈璘自喀喇鄂博攻克得
勝堡略代州夜襲崞縣拔之王東板鎮二堡民棄堡遁復擊敗代州兵會上大
同籍俘獲以聞九年偕多爾袞岳託豪格等收察哈爾林丹汗子額爾克孔果
爾額哲師次托里圖收其全部師還岳託駐歸化城薩哈璘偕多爾袞豪格入
明邊略山西事詳多爾袞傳諸貝勒大臣屢請上尊號不許既收察哈爾復請
上仍不許薩哈璘令內院大臣希福等奏曰臣等屢請未蒙鑒允夙夜悚惶罔

知所措伏思皇上不受尊號咎在諸貝勒不能殫竭忠信展布嘉猷爲久大計
今諸貝勒誓改行竭忠輔開太平之基皇上宜受尊號上曰善薩哈璘爲朕謀
開陳及此實獲我心諸貝勒應誓與否爾掌禮部可自主之翼日薩哈璘集諸
貝勒于朝書誓詞以進上命以衆議告朝鮮薩哈璘因言諸貝勒亦當遣使示
以各國來附兵力強盛上嘉納之崇德元年正月薩哈璘有疾上命希福諭曰
羣子弟中整理治道啓我所不及助我所不能惟爾之賴爾其靜心調攝以副
朕望薩哈璘對曰蒙皇上溫旨眷顧竊冀仰荷恩育或可得生即不幸先填溝
壑亦復何憾但當大勦垂集不能盡力國家乃輾轉牀蓐爲可恨耳希福還奏
上惻然曰國家豈有專事甲兵以爲治理者倘疆土日闢克成大業而明哲先
萎孰能助朕爲理乎病革屢臨視見其羸瘠淚下薩哈璘亦悲痛不自勝五月
卒上震悼入哭者四自辰至午乃還仍于庭中設幄坐不御飲食輟朝三日祭
時上親奠痛哭詔褒薩哈璘明達敏贍通滿漢蒙古文義多所贊助追封額親
王上御翔鳳樓仙假寐夢人請曰額親王乞賜牛一故事親王薨初祭以牛薩

哈璘以追封未用上命致祭如禮康熙十年追諡薩哈璘子三阿達禮勒克德
澤杜蘭杜蘭恩封貝勒坐事降鎮國公阿達禮薩哈璘第一子襲郡王崇德三
年從伐喀爾喀五年五月偕濟爾哈朗駐義州迎來歸蒙古多羅特部明錦州
杏山松山兵出拒擊敗之師還賜御廐良馬一六年圍錦州降城中蒙古台吉
諾木齊吳巴什等敗明援兵于錦州南山西岡明兵復自松山沿海進援我兵
薄城下擊殲其衆圍松山明兵來犯擊敗之斬千四百餘級七年明將夏承德
約內應夜半我軍梯登遂克松山敍功賜鞍馬一蟒綬九十尋管禮部與議政
先是上御篤恭殿王以下皆侍立碩託奏定儀制上御殿及賜宴親王以下皆
跪迎上升階方起駕還清寧宮亦如之貝勒阿爾泰伐明薊州偕多鐸屯寧遠
繼明師八年太宗崩坐與碩託謀立睿親王譴死順承恭惠郡王勒克德渾薩
哈璘第二子阿達禮譴死緣坐繼宗室順治元年復宗室封貝勒二年命爲平
南大將軍代豫親王多鐸駐江寧時明魯王以海據浙東稱監國其大學士馬
士英等率兵渡錢塘江窺杭州勒克德渾遣兵擊却之復遣梅勒額眞珠瑪喇

擊士英餘杭和託擊明總兵方國安富陽兩軍合營杭州城三十里外士英國安復率兵渡江又爲梅勒額眞濟席哈所敗溺死者無算十一月明唐王聿鍵所置湖廣總督何騰蛟招李自成餘部分據諸府縣命勒克德渾偕鎮國將軍衆阿岱率師討之三年正月師次武昌遣護軍統領博爾輝等督兵進擊戰臨湘殲敵千餘次岳州降明將黑述昌至石首敵渡江犯荊州遣尙書覺羅郎球等以偏師出南岸伺敵渡狙擊之師乘夜疾馳詰旦抵城下分兩翼躡敵營大破之斬獲甚衆薄暮郎球等亦盡奪敵舟以歸翌日分遣奉國將軍巴布泰等逐敵自安遠南漳喜峯山關王嶺至襄陽擊斬殆盡次彝陵自成弟孜及諸將田見秀張耐李佑吳汝義等率馬步兵五千詣軍前降獲馬廐牛萬二千餘捷聞優詔班師賜金百銀二千五年九月進封順承郡王尋偕鄭親王濟爾哈朗督兵攻湘潭拔之擒騰蛟移師入廣西攻全州破趙廉克永安關逐土寇曹楨子又敗之於道州七年師還賜金五十銀五千八年掌刑部事九年三月薨康熙十年追諡子勒爾錦襲康熙十一年掌宗人府事十二年吳三桂反命爲甯

南靖寇大將軍率師討之十三年駐荊州三桂兵陷沅州常德分兵抵巴東逼襄陽遣都統鄂內率兵防守三月三桂將劉之復率舟師犯彝陵夾江立五營遣護軍統領額司泰等水陸並擊大敗之四月三桂將陶繼智復自宜都來犯又敗之七月敗三桂將吳應麒等十四年五月三桂兵犯均州遣都統伊里布擊敗之六月叛將楊來嘉來犯列陣山巔自山溝下斷我師道師擊之斬三千餘級疏言敵逼彝陵兵衆舟多請益戰艦以斷運道上從之七月三桂將王會等合來嘉犯南漳遣伊里布與總督蔡毓榮會師擊之八月疏言賊立壘掘塹騎兵不能衝突當簡綠旗步兵造輕箭簾車礮車並進填壕發礮繼以滿洲兵庶可滅賊上復從之十月復興山十二月請發禁旅益師上責其遷延十五年自荊州渡江破敵于文村於石首復戰太平街師敗績退保荊州九日遣副都統塞格復郢西十八年設隨征四營轄新增兵萬二千三桂既死復渡江克松滋枝江宜都及澧州進取常德敵焚廬舍舟艦先遁所置巡撫李益陽按察院陳寶鑑等降遣兵至青石渡吳世璠將潘龍迎戰師左右夾擊追至平峪舖斬

賊無算敵墮崖死者甚衆復衡山攻歸州敗世璠將廖進忠于馬黃山追至西
壤復歸州巴東十九年詔趣取重慶疏請留將軍噶爾漢于荊州親率師赴重
慶中途引還具疏自劾請解大將軍任赴沅州軍自劾上責令還京師下吏議
以老師糜餉坐失事機削爵子勒爾貝襲二十一年薨弟揚奇襲二十六年薨
弟充保襲三十七年薨弟布穆巴襲五十四年坐以御賜鞍馬給優人削爵以
從父諾羅布襲諾羅布勒克德渾第三子初授頭等侍衛累官至杭州將軍襲
爵五十六年薨諡曰忠子錫保嗣雍正三年掌宗人府事在內廷行走四年諭
曰順承郡王錫保才具優長乃國家實心効力之賢王可給與親王俸授都統
坐徇貝勒延信罪不舉劾又逮治遲誤奪親王俸降左宗正七年三月師討噶
爾丹策零命錫保署振武將軍印駐軍阿爾台九年上以錫保治軍勤勞進封
順承親王命守察罕叟爾噶爾丹策零遣其將大策零敦多卜小策零敦多卜
多爾濟丹巴入犯科布多次克魯倫侵掠喀爾喀游牧蒙古親王策棱等合師
邀擊道台吉巴海夜入大策零敦多卜營挑戰擊斬其將喀喇巴圖魯大策零

敦多卜等自哈布塔克拜達克遁歸錫保疏報得旨嘉獎十一月授靖遠大將軍十年七月策棱等敗敵額爾德尼昭十一年疏請城烏里雅蘇台從之尋以噶爾丹策零兵越克爾森齊老不赴援罷大將軍削爵子熙良初封世子以錫保罪並奪尋命襲郡王乾隆九年薨諡曰恪子泰斐英阿襲授都統左宗正二十一年薨諡曰恭子恆昌襲四十二年薨諡曰慎子倫柱襲道光三年薨諡曰簡子春山襲咸豐四年薨諡曰勤子慶恩襲穆宗大婚賜三眼孔雀翎光緒七年薨諡曰敏子訥勒赫襲德宗大婚賜食全俸孝欽皇后萬壽歲加銀二千遜位後薨諡曰質謙襲郡王瓦克達代善第四子天聰元年師攻寧遠擊敗明總兵滿桂瓦克達力戰被創崇德五年從多爾袞圍錦州敵兵樵採瓦克達以十餘騎擊斬之六年洪承疇以十三萬人援錦州次松山敵騎來奪我紅衣礮瓦克達偕滿達海戰却之天兩復戰又敗之進擊承疇步兵噶布什賢什長費雅思哈失馬瓦克達與累騎而出甲喇章京哈寧阿墜馬創甚敵圍之數重瓦克達入其陣挈以歸碩託譴死緣坐黜宗室順治元年從多爾袞入山海關追擊

李自成至慶都復從阿濟格自邊外趨綏德二年自成遁湖廣踞至安陸賊方乘船遁瓦克達偕巴牙喇蘇章京熬拜涉水登岸射墮賊衆奪其船以濟大軍三年敘功復宗室授三等鎮國將軍從多鐸勦蘇尼特部騰機思騰機特等至圖拉河斬騰機思孫三騰機特子二及喀爾喀台吉十一並獲其輜重至布爾哈圖山復與貝子博和託合軍進斬千餘級俘八百餘人獲駝馬牛羊無算又擊敗喀爾喀土謝圖汗兵四年進封鎮國公五年上念宗室貧乏瓦克達賜銀六千進封郡王喀爾喀部二楚虎爾擾邊從阿濟格防大同復從討叛將姜瓖圍渾源六年偕滿達海攻朔州發礮墮其城移攻寧武瓖將劉偉趙夢龍守焉縱火棄城走瓖將楊振威斬瓖降阿濟格偉夢龍亦降於瓦克達靜樂及寧化所八角堡諸寨悉平十月代滿達海爲征西大將軍勦山西餘寇明大學士李建泰既降復叛踞太平園之二十餘日窮蹙出降詔誅建泰及其兄弟子姪籍家產入官連復平陽屬縣三十六七年師還八年加封號掌工部預議政九年坐事解部任罷議政薨康熙十年追諡瓦克達營駐軍平陽戢軍安民既薨平

陽人建祠以祀。薨之明年，授其子留雍哈爾薩三等奉國將軍、品級。康熙六年，留雍哈爾薩訴瓦克達功多，授哈爾薩鎮國公。留雍鎮國將軍八年，留雍復以己爵卑，訟不平。議政王等言：「前爵資緣輔政所得，宜併黜革。」上命並降奉國將軍品級。二十一年，哈爾薩復訴瓦克達爵乃功，封例得襲命襲鎮國公，並封其子海青輔國公。哈爾薩累遷，右宗正二十五年，詔責其鑽營與海青并奪爵，又以留雍襲鎮國公三十七年，復以情奪爵。乾隆四十三年，高宗錄瓦克達功，命其四世孫洞福以鎮國將軍世襲輔國公。瑪占代善第六子天聰九年，多鐸自廣寧入寧遠，錦州綴明師瑪瞻在事有功。崇德元年，從阿濟格入長城至安州。克十二城，師還上郊，勞賜酒一金。扈封輔國公。三年，從岳託自墻子嶺毀邊城，入密雲，連克臺堡，越燕京，趨山東，卒於軍。四年，喪歸，賜銀二千，駝馬各一，無子，未立後。